



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

📧 tiryimiyim@aolima

📺 tir yimiyim

TAPAK 10



Manipur CM-i aluyimer 210 nem Rs 125.955 lakh agütsü

IPL Lucknow franchise-i Dahiya assistant coach asütsü shim



VOL. XIX NO. 76 (ADOK 76)

DIMAPUR

YANGTEPNÜ

(THURSDAY)

LUCHII

(DECEMBER) 23, 2021

₹ 5.00

Governor aser kinungtsü nati benjung salem lemsateper

Dimapur, December 22, 2021 (TYO): Assam aser Nagaland Governor Prof. Jagdish Mukhi-i pa aser pa kinungtsü Prem Mukhi tenüing nung Nagaland nung alirtem den benjung salem lemsatepogo.

"December 25 ya Yisu Khrista asoba tongtipang anogo ka lir. Pai tatok agütsüba, yimjung bener aruba aser temeim sayuba tatishitsütem asenoki benshitsü azüingashidi" ta

Prof. Jagdish Mukhi-i ashi.

"Asenoki tangar aser medemertem den benjungtepang aser salem lemsatepang tebilemstü bendi aser Nagaland renlokdahtsütsü aser azükarutsü atema inyakdi" ta paisa ayongzüik.

"Kübotsü künati Nagaland nung alir ajak dang Christmas aser Küm Tasen tepela salem metetdaksür" ta Governor-isa ashi.

Mangkolemba nung EE PWD (R&B) office lapoktsüogo

Dimapur, December 22, 2021 (TYO): Mangkolemba nung November 1, 2021 nungi Executive Engineer PWD (Road and Bridge) office shibangtsüba December 20, 2021 nungi khen atema lapoktsütsü telemtetba agiogo, ta Civil Society Organisation (CSO) Mangkolemba Sub-Division-i ashi.

Longnak-Mangkolemba road (11 kilometre) yanglutsü takhangba agüja EE PWD (R&B) office shibangja liasü.

National Highways and Treasuries and Accounts Advisor Dr Longrineken-i Chief Minister dang

iba lenmang yanglutsü sen meshia shidi züluba agizükba sülen CSO-i office lapoktsütsü telemtetba agi.

Külen, Higher and Technical Education Minister Imna Along Longkumer aser Advisor Dr Longrineken naprongi 'work proposal' tang teinyakdak lir ta shia office lapoktsü mepishia liasü, ta CSO Convenor I Tia Jamir aser Secretary Wapongtoshi nati sangdong ka nung ashi.

Ajisüaka, iba gari lenmang meyanglu tashi CSO, Mangkolemba Sub-Division-i maneni takhangba agütsütsü, ta tenatisa ashi.

ADG CRPF-i Nagaland tensa meyipa repringshi

Dimapur, December 22, 2021 (TYO): Mon District nung tai maketba civilian tem tepsetba ajanga tensa mejungi akümba sülen ADG North East Zone CRPF, Sanjeev Ranjan Ojha, IPS aser Mahabir Singh Shekhawat, IG Manipur & Nagaland nati CRPF mapa lemzükja aliba meyipa repringshiogo.

December 15 nungi 19, 2021 tashi ADG North East Zone CRPF, Sanjeev Ranjan Ojha-i Kohima, Zubza aser Dimapur den Disputed Border Area (Nagaland-Assam) semdanga liasü.

Security lendong tulu ajurutsü ta bilemba aser telungpur khuret liaka CRPF-i VIPs, vital installations, convoy protection mapa nung timtem kecha maludaktsü shitak inyaktüsü tetuyuba agütsür, ta Ojha-i ashi.

Alima tatsükba akümba azüoktsü atema Central School camp, Kohima nung süngdong atema nunga pai shilem agia liasü.

Covid wara tasembuba (Omicron) ajanga tuluka mekongshitsü atema ADG Sanjeev Ranjan Ojha-i "Covid-

care distribution programme" nung Covid-care & hygiene items lema agütsü.

Iba sentong ya December 18, 2021 nü Central School, Kohima nung ayongzüka agi.

Paisa CRPF sepaitem dang azü tenlaba, disaster management, Covid/ AIDS awareness, cleanliness/ plantation drive amala nung nübortem den yariteptsü ayongzüik.

"CRPF sepaitem teti kümüma alitsüla aser tensa süngjema ayutsü atema mapa inyaktüsü. Public nem timtem magütsü aser Human Rights inyakyim nung aliba ama sepaitemi State Administration aser police den amalitepa inyaktüsü" ta paisa metetdaksü.

Covid wara anema raraba nung yaritsü atema CRPF Wives Welfare Association, North-East States president Anju Ojha aser CWA of Nagaland & Manipur president Manmohan Shekhawat aser Strategy Planner & Social Reformer Arshiya Ojha nungertemi nübortem nem PPE Kit, face mask, soaps, gloves, Vitamin C agütsü.

Dimapur nung ki 100 tema rongdok

Dimapur, December 22, 2021 (TYO): Bodbar nikongdang Dimapur kübok Ura Villa colony nung kitsükkirong lendong tulu ka atalokogo.

Tanü nikongdang 5:00 ako süir lendongji atalok.

Iba osang zülü tashi nung ki 100

tema mitsü kuma rongdokba angashir saka tia kaa nisung taküm samaba mesüra yiruyibong asüba osangbo kecha mali.

2018 nunga kasa anogo nung iba kiyong nung kitsükkirong lendong ka atalokdang ki 31 tashi rongdoka liasü.

METETDAKTSÜR :

December 23, 2021 anungi December 26 tashi Tir Yimiyim nung inyakterem Christmas sodi agir, anungji December 28, 2021 adok nungi dang Tir Yimiyim angütsü.

Tir Yimiyim azüingertem ajak nem Tsüngrem temeim Christmas salem agütsür. Tsüngremi Christmas mapang aser teti nenok taküm aser kibong nung tesünep aser tepela lidakjangma !

- Yimozülur.

COVID-19 Nagaland: US nungi meyipa arur ka dak COVID-19 putet State nung 'genome sequencing facility' maliba agi tangaleni yokogo

Kohima, December 22, 2021 (TYO): USA nungi meyipa arur dak COVID-19 putetba sülen Health and Family Welfare (HFW) Department-i variant metetstü atema genome sequencing asütsü yokogo.

"Iba nisung ya anogo 8 tejakdang Nagaland-i aru aser inyakyim lateta aliba ama quarantine asü. Pa indang sample tendangba nung COVID-19 aliba putet" ta Principal Director Dr Neikhrilie Khimiao-i ashi.

"Nagaland nung 'genome sequencing' asütsü facility mali anungji sample ji tangaleni tendangtsü yokogo aser anogo 5-6 tsüingda osang angütsü. Iba osang mangashi tashi koba variant'ar meshitetstü" ta pai ashi.

Omicron ya 'variant of concern' lir aser Delta variant dang nungi asemben agi temelaba menateper. Department-i genome sequencing osang anguba sülen inyaktüsü renema lir, ta Dr Khimiao-isa ashi.

"Nagaland nung artsülen aliba district tem - Dimapur, Kohima, Mon, Phek, Wokha aser

Mokokchung nung tangaleni nungi arur kanga junga repringa tendangtsü tetuyuba agütsüogo" ta paisa metetdaksü.

"US nungi aruba sülen mezüing tendangdang negative putet aser iba jagi anogo 8 tejakdang Dimapur-i aotsü temelaba agütsü" ta Integrated Disease Surveillance Programme atema State Nodal Officer, Dr Nyanthung Kikon-i ashi.

"Tanü pa dak COVID-19 aliba putet saka shirangba yimya kecha mali. Department-i contact tracing aser tanga maparen tenzükogo aser standard operating procedures (SOPs) inyakdar" ta pai metetdaksü.

"Iba benjung mapang Omicron variant dang masü saka linük nung kanga bulua menatepba Delta variant prokshitsü tsüba bilemer. Anungji nisungtemi COVID-19 inyakyim benshitsüla, lokti adenshidaki maotsüla, CAB sülen anidaktüsü aser vaccine agitsüla" ta Dr Kikon-i ashi.

Omicron ajanga temang nung timtem balaka tulu magütsür saka iba variant ya kanga melamela

menateper, ta paisa ashi.

"HFW Department nung genome sequencing atema mongin nübotem lir aser iba jagi Kohima nung aliba BSL-3 laboratory nung iba facility lapoktsü atema sorkar dangi benogo" ta Bio-Safety Level-3 laboratories, Nagaland atema State Nodal Officer, Dr V Tina Khamo-isa ashi.

Tangaleni nungi arur ajak dak entry points nung tendangtsü aser quarantine asütsü nungdaker, ta Dr Khamo-i metetdaksü.

"District Administration aser CMO temi tendangba maparen ulushitsüla kechiyong testing kits peria dang lir aser district tem nem senotsü talila lemzüktsüogo" ta Principal Director-isa ashi.

"District Immunization Officer aser Chief Medical Officer tem dang vaccine agütsüba maparen ulushitsü tetuyuba agütsüogo aser iba atema sen talila lemzüktsüogo" ta Dr Khimiao-isa ashi.

Nagaland nung vaccine ajema agiba district punjuji- Noklak, Kiphire, Peren, Phek aser Wokha lir, ta paisa shisem.

Taoba ita 12 tashi Dimapur tensa junga dang liasü: CP

Dimapur, December 22, 2021 (TYO): Dimapur nung taoba ita 12 tashi law & order tensa junga dang liasü ta Commissioner of Police Dimapur, Rothihu Tetseo, IPS-i metetdaksü.

Dimapur Police Action Plan kübok Dimapur police-i tashiyim agi sen saruba aser ozüing alema sen saruba inyakyim azüoktsü atema mapa talila inyaker. District Action Plan mapa tenzükba sülen taoba ita pezü tsüingda tashiyim agi sen saruba kanga ajema kümogo, ta pai ashi.

Traffic police-i lenmang nung aser talisa highway nung gari lendong noktangtsü atema kanga meranga inyaker aser taoba ita pezü tsüingda highway nung lendong tulu matalok, ta Rothihu Tetseo-isa ashi.

Benjung mapang Dimapur police-isa public safety aser road traffic atema tetuyuba agütsüogo ta paisa shisem.

"Dimapur city centre aser Purana bazaar/ Chumukedima highway nung road traffic akangakanga inyaktüsü anungji

public-i road traffic dak sendakba inyakyim sülen anidaktüsü mepishir" Rothihu-isa metetdaksü.

District Action Plan nung aliba ama Dimapur kübok tongtipang tesemtem nung Special Armed Deployment mapa lemzüktsütsü aser Dimapur-i aruba mesüra New field/ Dellai Gate nungi Medziphema tashi trucks/goods garitem meintsü.

Rongdak nungdak adokra Dimapur Police Website www.dimapurpolice.in nung aliba Officers aser Police Stations mesüra Police Control Room nung Helpline No. 100 mesüra M/ No.7085055050 ajanga tongteptsü akok ta Commissioner of Police-isa metetdaksü.

Nisungtemi 'silent zones' (Hospitals/ Health Care Centres, Educational Institutes, Religious places) telongtet metre 100 tashi nung fireworks mamshitsüla aser Christmas o New Year Eve nung aonung 11:55 ako nungi anepdang 12:30 ako tashi fireworks amshitsü melatsü ta paisa ashi.

Covid-19 indang Omicron variant menatepba ajanga public-i COVID-19 inyakyim beshitsü mepishir, ta paisa shisem.

January nungi December, 2021 tashi gari auyaba ken o tem rongnung two-wheeler teimba auya. Iba dak sendakba ken o 280 benok aser nisung 83 apu. Kasa mapang nung tashiyim agi sen saruba ken o 98 benoka liasü aser nisung 138 apu.

NLTP/NDPS Act kübok ken o 71 benok aser nisung 92 apu. Külen, Extortion & Arms Act kübok ken o 158 benok aser nisung 197 apu, ta Commissioner of Police, Dimapur-isa metetdaksü.

January nungi December tashi nung Non-FIR kübok ken o 15,000 benok aser traffic ozüing mebenshir nisung 24,600 dang senchi achi, ta paisa ashi.

Dimapur police-isa Purana bazaar nung nisung pur aoba, kitsükkirong lendong atalokba aser Cybercrime ken o tem takok ngua inyaktetogo, ta Rothihu Tetseo-isa ashi.

Nagaland House nung RSS-i yaria sentong agiba aitsür: RPP

Dimapur, December 22, 2021 (TYO): December 16, 2021 nü the RSS-i teyari agütsüba Bharatiya Christian Manch ajanga Nagaland House, New Delhi nung pre-Christmas sentong ka ayonga agidang RSS tanishir Indresh Kumar-i olen kar jembiba ajanga nisungtem jashidaktsüba osang angazüker, ta Rising People's Party (RPP)-i ashi

Indresh Kumar-i tamangba yimsü melenba olulu jembiba ajanga India nung Christian tem anema inyaksanghiba mita repringer United Christian Forum telok jashidaktsüogo, ta parnoki ashi.

December 16 nü sentong agiba ya nung osang tai prokshiba sentong ka ama ajiteter aser iba ashishitep aketba sentong ya national daily newspapers teimba ka nung adokogo. Iba ajanga Nagaland tenüing menüktsüogo aser iba tebilemstü khuret ya state sorkari abentsü, ta RPP-i metetdaksü.

Nagaland House nung tamangba yimsü indang osang tai prokshiba aser political party mapa inyakba khukhua aitsür. India kübok Nagaland House nung official sentongtem agiba dak alaka political party maparen

kecha meinyaktür anungji iba sentong ajaki aitsütsüla, ta RPP-isa ashi.

Nagaland House nung Pre-Christmas sentong agitsü atema shibai temelaba agütsü aser state co-organizers shirnok liasü'ar state sorkari telangzüba agütsütsü imlar. Iba sentong ajanga ashishitep ken o adokba atema state sorkari Nagaland nung alirtem dang tatok meshitsüla aser tarutsü nung Nagaland House tem nung ibala mesükba sentong magitsü atema sangdong ka agütsütsüla, ta Rising People's Party-isa metetdaksü.

NPCC ajanga Christmas & New Year salem lemsatep

Dimapur, Luchii/Dec. 22 (TYO): Oting lendong atalokba asoshi asenoki tejak makumer Christmas benjong amungba mapang asenoki sarasadem nung mangyimer kibong tem bilemtetti, ta NPCC tir K. Therie ajanga sangdong ka nung ashi.

Asen kumtetdakba aser asen kumzüksang Yisu Khrista asoba benjong amungba ajanga Tsüngremi asen meimba yong Pa jabaso asen menen yong takum tenla asen nem teti tatem

maka takum agütsü, ta asenoki bilemtetti.

Tai nangzüker aser tatok meshir nem asen Tebui tatok agütsüaka aseni tatok meshiba kasa aibelen tanaben meinyaktsüsa alitsüla, ta sangdong ajanga ashi.

Tashidak wara nungi Pai asenok kumzükba atema tenüngsang agütsüti aser iba tepela, tesunep aser temeim benjong metongteter asoshi asenoki bilemtetti aser kanga kumdanga

iba benjong mungti, ta ashi.

Aseni iba benjong amungba mapang asen takum nung Khrista kadaktsüti. Iba mapang ya ajanga asenok Tsüngrem den tesendaktep tali tajungba yanglushiti.

Kü den külemi NPCC züngsem ajungai temoatsü aliba Christmas aser yimjung, tepela, temeim aser yimchi-yimjung aliba Küm Tasen südakjang ta sarasademer, ta kasa sangdong ajanga ashi.

Minister Tongpang-i MBKU indang Office-cum-Honey Shop semzüksü



Bee Keepers' Union office-cum-Honey Shop, Minister, PWD (Housing & Mechanical) Tongpang Ozukum ajanga December 21, 2021 nü semzüksüba sentong nung tangokba noksa nung angur.

Kohima, Luchii/Dec. 22 (TYO): Kohima district kübok kanga nüngdaka aliba Bee Keepers' Union office-cum-Honey Shop ka Minister, PWD (Housing & Mechanical) Tongpang Ozukum ajanga December 21, 2021 nü semzüksüka liasü.

Iba sentong Apiarian Park nung agiba mapang Minister Tongpang-i yimdaklir dang ninang metsüba ya pei jangraba mapa ka amai masü saka takum alitsü asoshi teyari aser rongsenketzüng ajungkettsü asoshi mapa ka ama inyaktsü ajungshia liasü.

Union ajanga yimtsüng nung ninang mojitzü ayokba dokan lapokba asoshi pela jembiba mapang, state yimtiba nunga ninang mojitzü ayokba dokan ka amenok nung ajungtsü aser iba atema akok tashi yariteptsü molunga lir, ta pai ashi.

Paisa Mima yimdak ninang metsür ajunga dang yimtsüng nung adokba ninang mojitzü ya yimtsüng aser state nungi adokba oset ka ama kumdaktsütsü asoshi lungjemer inyaktsü ajungshia liasü.

Ninang ya mapa meranga inyakba shiruru ka lir aser tanang agütsür, yamaji yimtsüng nung alir temia maneni meranga

inyaka ajak asoshi tajung agütsütsü ayongzü.

Minister Tongpang-isa iba tesem nungi adokba MLA aser Advisor Medo Yhokha ajanga akok tashi teyari agütsütsü ashi.

Nagaland nung Mima ya ninang mojitzü adokba yimtsüng ka aser state nung ninang metsüba maparen yangi tenzük, ta Advisor, Horticulture & Border Affairs, Mhathung Yanthan-i sentong nung ashi.

Nagaland aser India indang honey map nung Mima ya dena lir, kong ali telung nung ninang metsüba yimya amshir. Otsüla-ouboula nungeri amshiba yimsü aser yimya tem mesamadaktsütsüla, ta pai ashi.

Ninang metsüba technology tajungba kumdaktsütsü indang jembiba mapang, Horticulture department ajanga ninang metsüba ya mission ka ama inyaker aser Mima yimtsüng mechi Nagaland Beekeeping and Honey Mission ya tenzük, ta Advisor Mhathung-i ashi.

Mima Bee Keepers' Union (MBKU) tentetba atema pai pelaba lemsatep aser parnok dang ninang mojitzü tajungba adokdaksütsü aser kasa mapang rongsen renloksü aser mürekmejua amshitsü ajungshia liasü.

Linük nung danga tesemtem dang nungi Nagaland nung adokba ninang mojitzü ya tajungtiba ta züngshir, ta pai ashi.

Yanthan-isa local MLA Yhokha ya lanur, tashi tait aser nükla tajung aketba lenir ka lir, anungji taruba election nunga pa shimtetsüla, ta ashi.

Advisor, Elections and Technical Education, Medo Yhokha-i yimdaklir dang tajangzüik asoshi kisüng masü saka maneni ninang mojitzü yim ta tenüng jaloktsüba mesamadaktsütsü ayongzüka liasü.

Iba sentong nung Minister, Tribal Affairs and Higher Education, Temjen Imna Along; Advisor, Youth Resources Zale Neikha; MLA T Yangseo Sangtam asr NDPP general secretary Ekyimo Kikon nungertema dena liasü.

Iba sentong nung Medolhou Pfukha menden liasü aser Christian Revival Church indang pastor Kho-o Pfukha-i sarasadema sentong tenzük.

Sentong nung Mima Village Bee Keepers' Union indang mendenpuba, Khriesavilie Khamo-i metetpela o jembi aser Advisor MBKU Adu Livi-i melepzüng o jembia liasü.



Mokokchung Town Baptist Arogo (MTBA) Youth Department-i ayongba XXXIII Children's Christmas Cake Carol Competition (C5) nung takoker A&D Youth Fellowship-i shilem agidang tangokba noksa nung angur. Medical Youth Fellowship pur tanabuba aser A&B Youth Fellowship pur tasembuba jenang nung liasü. Taküm iba sentong ya "Rekindling the Christmas spirit" omen nung ajemdaker MTBA tenla kidang agi. (Mokokchung, 22 December, 2021)

DHE director Dr. Apeni Lotha den tepila sentong agi



Minister, Higher Education and Tribal Affairs, Temjen Imna Along den Dr. Apeni Lotha aser dangartem külemi tangokba noksa ka yangi angur.

Kohima, Luchii/Dec. 22 (TYO): Directorate of Higher Education, Nagaland nung director menden nungi anisüngzükla, Dr. Apeni Lotha den tepila sentong ka December 21, 2021 nü agia liasü.

Dr. Apeni ya Higher Education indang director ka ama taküm December 31 nü mapa nungi anisüngzüksü.

Kohima nung iba tepila sentong nung jembiba mapang, Dr. Apeni-i state nung higher education temaba jenjangi ajungketba asoshi Minister, Higher Education & Tribal Affairs, Temjen Imna Along-i tenüngsang agütsü.

Director ka ama mapa inyak tenzükba anogo nungi tanü tashinung la tekolok aser molungjang ya Department of Higher Education nung liasü, ta Minister Along-i ashi.

Dr. Apeni-i teinyaktsü tim mapa ajak nung temolung agüja inyak, ta pai ashi.

Tashidak wara agi alima tesem ajunga sünger lia la director ka ama aruaka, state nung higher education indang sentong nung lai temelenshi tulu arudaktsü, ta Minister-i ashi.

National Education Policy 2020 nung lai shilem tulu agiba ya iba linük aser Nagaland state nung küm aika amshitsü, ta pai ashi.

"Tanü asenoki Dr. Apeni Lotha takok otsü benjonger, shiba küm 35 tashi mapa inyaker temang anema aser junga lia mapa nungi anisüngzüker," ta Commissioner & Secretary for Higher & Technical Education, Honje Konyak ajanga ashi.

La dak nendaka aser meranga inyakba yimya aliba asoshi pai tenüngsang agütsü.

Küm ishika Minister Temjen Imna Along kübok department tenzükba asoshi pelaba lemsatepba mapang, department nung ki-o-jen terenlok jenti bener aruba aser mapa jeta inyaktetba atema lai Minister Along nem tenüngsang agüja liasü.

Department nung Minister Imna Along-i terenlok aser temelenshi jenti bener arutsüogo, ta pai ashi.

Ajidang masü Honje Konyak aser department nung taoba Commissioner & Secretary ajanga nungitba aser len sayuba asoshia pelaba lemsatepba liasü.

Higher Education ya human resources development aser tarutsü putu asoshi inyaker, anungji college ajunga nungi principal aser tesayurtemi tenok-tenoka khuret abentsüla, ta lai ashi.

Dr. Apeni-isa principal tem dang college assessment aser NAAC accreditation tajungtiba

ngutettsü asoshi tali meranga inyaktsü ajungshia liasü.

National Education Policy tajungtiba nung mapa kuma inyaktsü asoshia lai ajungshia liasü.

Grade IV staff tem dang pelaba lemsatepba mapang, lai parnok dang yimya tajung süpaa aliba maneni amshitsü ajungshia liasü.

Additional director Dr. Katoni Jakhalu den külemi inyakba indang pelaba lemsatepba mapang, 2022 tashinung Dr. Jakhalu ya Higher Education indang director akumba sülen department tali twangshiba akumtsü imlar, ta lai ashi.

Department tali tajungba nung anitsü asoshi Dr. Jakhalu nem shisatsü aser anema aliba mojang ta sarasademsür, ta ashi.

Dr. Apeni-isa Technical Education Department, directorate indang ministerial staff aser tir Dr. Visakhonü Hibo-i anir Nagaland College Principals Association (NCPA) ajanga tapok madokdaksü nungita yariba atema pelaba lemsatep aser kasa yimya maneni amshitsü imlar, ta ashi.

Dr. Apeni dak mapa inyaktsü asoshi tangatetba tajung liasü, ta Additional director, Higher Education, Dr. Katoni Jakhalu-ia ashi.

"Department atema lai tajungtiba inyakogo, aser iba atema asenoki la dang teti pelatsü," ta Dr. Jakhalu-i ashi.

Dr. Apeni ya Mt. Tiya College, Wokha indang principal ka ama küm 7 shi inyak aser la lenisüba kübok 2018 küm college ya takok ngua NAAC assessed asü, ta lai ashi.

2019 küm Dr. Apeni ya additional director aser HoD mendeni atu aser 2020 nungi tanü tashi Higher Education indang director ka ama inyka aru.

Theology azüngba kaketshirtem nema shisaliok tajung agütsüdaktsütsü nükjidong nung Dr. Apeni-i animesor state nung aliba theological college tem semdanga survey agia jaja, ta Dr. Jakhalu-i ashi.

"Nai tanü iba department yujaka, kechi ajurudir ajuruaka nai inyakba ama tashi ajunga agi iba department wazüka ayutsü," ta Dr. Jakhalu-i ashi.

Nagaland nung aliba college tem indang principal tem tenüng nung Dr. Ralimongla, principal, Kohima College, Kohima ajanga Dr. Apeni aser lar kibong den salem lemsatepba liasü.

Lai teti state nung Higher Education tajungba kumdaktsütsü aser renloksü asoshi rangloker inyakogo aser lai tajungtiba nung bendanga agütsür inyakba asoshi onoki na tushir, ta lai ashi.

NIIT Dimapur ajanga metetdaktsür

Dimapur, Luchii/Dec. 22 (TYO): Christmas benjong mechi NIIT Dimapur Center nung class tem December 24 nungi December 26 tashi magi alitsü, ta Ajay Sethi, Head of Center, NIIT Dimapur Center ajanga sangdong ka nung ashi.

Center ya December 27,

Hombarnü tanaben lapoktsü. NIIT Team ajanga Nagaland nung aliba nüburtem aser talisa kaketshir tem dangi jelia Christmas benjong salem abener.

Yimjung Chuba-i asenok ajak nem teti tesunep aser tepela mojangma, ta sangdong ajanga ashi.

Assam & Meghalaya MP temi Sonia Gandhi den ajurutep



Assam & Meghalaya MP temi Sonia Gandhi den ajurutepdang tangokba noksa nung angur.

Guwahati, December 22, 2021 (Agencies): Assam aser Meghalaya nungi Congress MP temi Bodbarnü New Delhi nung national president Sonia Gandhi den ajurutep.

Congress MP temji Meghalaya Congress president & Shillong MP Vincent Pala, deputy leader of opposition in Lok Sabha Gaurav Gogoi aser Assam Congress MP Pradyut Bordoloi o Abdul Khaleque nung liasü.

Northeast nung tashimait akümbe mapang ka nung

Assam aser Meghalaya nungi Congress MP temi Sonia Gandhi den ajurutepogo.

Taoba mapang Northeast ya Congress party indang tesem ka ama züngshia liasü.

Meghalaya nung taoba chief minister Mukul Sangma dena MLA 12-i Congress toktsür TMC nung aden.

Meghalaya nung taginüba nung ajemdaker parnoki Congress toktsü ta Mukul Sangma-i ashi.

Assam nunga Congress züngsem aikati party toktsüogo. Taoba mapang Rupjyoti Kurmi aser Sushanta

Borgohain nati Congress toktsür BJP nung aden.

State aser national level nung Congress lennirtem dak temolung masüba ajanga party toktsü ta tenati ashi.

Külen, TMC-ia taoba Congress lennir Sushmita Dev aniokba ajanga Assam politics nung tetsüing ajemokogo.

Sushmita Dev ya tang TMC Rajya Sabha MP ka lir aser Assam kübok Barak Valley nungi yimtenren lennir ka lir.

La ya All India Mahila Congress (AIMC) president inyaka liasü saka lai Congress toktsür TMC nung aden.

2023 nung ochimashi maliba sorkar akümstsü: Mizoram Congress

Aizawl, December 22, 2021 (Agencies): Mizoram nung tawa tasen shimba Congress president Lalsawta-i ochimashi sorkar ka akümstsü renemer ta metetdaksüogo.

2023 nung sorkar yimsü asütsü tashi ngura Congress party-i Mizoram nung tebilemstsü khuret abenba sorkar ka kümtettsü, ta Lalsawta-i ashi.

"Onoki ochi mashiba maliba sorkar tajung ka akümsts. Onoki tasütait sorkar ka akümstsü aser ozüing alema inyaker ketdangsürtem dena merenshitsu" ta pai metetdaksü.

Lalsawta ya taoba Mizoram finance minister lir aser paisa ashiba agi taruba assembly election nung takok ngura par sorkari senotsü maparen tiptema inyaksü.

Chief minister Zoramthanga-i aniba Mizo

National Front (MNF) sorkari senotsü timi mamshiba ajanga senotsü khuret ajurua lir, ta paisa tai tongloktsü.

Congress-i sorkar mapa inyakerter aser pensioner nem itasen aser pensions mapang shitak nung agütsütsü, ta Lalsawta-i ashi.

Tang Mizoram sorkar kübok mapa inyaker aser pensioner nem mapang shitak nung itasen magütsüteter. Tang sorkari pensioner nem pension fund Rs 11,328 lakh magütsü lir ta paisa metetdaksü.

"Sen yong vote alizükba yimsüsürtem nem sorkar mekümdaksütsü" ta paisa ashi.

Taruba Assembly election nung sorkar akümstsü takok ngura Congress-i New Land Use Policy (NLUP) mebenoktsü aser sen alemba mapa anentsü, ta Mizoram Congress president-isa metetdaksü.

Manipur CM-i aluyimer 210 nem Rs 125.955 lakh agütsü

Imphal, December 22, 2021 (Agencies): Manipur Chief Minister N Biren Singh-i Mongulbarnü aluyimer 210 indang bank accounts nung Rs 125.955 lakh enoktsüogo.


Tribal Affairs and Hills Department nung schemes ana kübok sen enoktsü.

Senji Senapati, Churachandpur, Tamenglong aser Chandel district tem nung aluyimer nem agütsü.

Aluyimertemi chemical fertilizers melena 100% organic manure amshitsüba sentong ka nung jembidang Chief Minister Biren-i iba osang metetdaksü.

Manipur kübok district 16 shia nungi horticulture/ agriculture kaka ajitetsü atema paisa ketdangsürtem nem tetuyuba agütsü.

Prime Minister Narendra Modi-i 2024-25 tashi nung India



N Biren Singh (File photo)

ya \$5 trillion economy kümdaksütsü alizüing ayuba nung Manipur-ia shilem agütsü ayongzüker, ta Biren Singh-isa metetdaksü.

Iba sentong nung TA & Hills minister Vungzagin Valte, Additional Chief Secretary (Horticulture and Soil Conservation) P Vaiphei aser tanga ketdangsürtem aden.

Christmas Card bener yoker?

-S. Nuken Longkumer, Naga United, Dimapur

Alimai yongyaseta belemba anogo ya temenungratsü aser jangratemsü anogo ka!! Alima ajunga nung iba anogo ya meimchir million aikati yongyateper? Yamaji tanü mesüingjemtetba putu nung teküzmükdak bushir dangi Christmas card bentsür, Christmas tetezü ya nür kibong nung meimtepba, tesünüp nung aliba dang Christmas ta ajar, iba anogo Tsüngrem chir yisu alimai aruba anogo ta alimai agizük? Iba tensa nung tetsü tajungka mali mesüra ano mejungra kipongtem amang tia ajurutsü! Alimaji tzüym tarok ialutü? Tsüngremi yangluba tzüim tarok ya tesüingmangtsü ka lir? meimchirtemi angatetsü makoker? Khristantem rongsen tulu nung temulung telemma no ta teyanglur Tsüngremi meimchir den jembio? Nür kipong akabaji timtemer yaritsü asoshi iba limai Tsüngremi na yok? Nür kipong takar aliba agi tanü alima ajunga nung sensakertem penlateper!! Alima nung wapong tajung maliba yimti azüingmeyaka akümer?? Nokinketer makaba limai kodanga tangar lima memenüptsü? Nokinketertem wapong tajungji nenok takar tulurtem lir!! Christmas card tetezü temeim!! Tulur takar tekabu nung yua lir?? Dr. Rev. Mar USA nungi arua pai yamai jembu, temeimji tatempang aji bushiangma!! Alimai kodanga mamatsü yisui yamai inyaker ao. Iba temeim osang tajung bener alimai arutsü!! Koda tepelatsü jangratemsü onük ka jembio!! Ainkar Yona ama rongsen meimba ajanga tesama tia ajuruba kipong aika lir, Khristan kümdangang??

CHRISTMAS OLA

-C. Lima Ozüküm, Mongsenyimti

Chuba mulung yimsadaksüsang Mongputem rongnung nübensor Ajak pangki lapoker Christmas ola Tila tulu pela nüktzü ayimer Mepet süshi Anü sangwa yaloktsü Kiyong kidanger aon kentsüteper Kotepkosür, yimlusüa jajar Aya tzüra sama mongpu ola jaji Makamait saka sübotsü tasen nung Ali khuret mali ama pelaseta Taküm peyong ne denang Oh! na taneptsüsang Christmas.

Asen taküm pelatepyongbo Oshi majemer roko den Nüktzü agi ananger bendang lima Taneptsü bushia longzüba pur ajak Tia majem asükhu mangyimertem Tanübo na, asüing pur ako Nisung shia lendongpang nung lir Shiba küla pei sentong ataloker aka? Khurema teli Pai asen khu tongzüksü Pungokang shi tanüla ajak shitokdi Christmas kiburi ajar Asüing mongutetra koda?

Khristmas Salem

- WhatsApp

Oh Koda tarok & talang ni asoshi Tsüngrem meim tesüingmangtsü ka tzüym tang nungi tarokba anung dang nungia talangba, bilemjemtsü makokba Christmas kentem atendanga, ken mejemertem indang shisadandang, Tsüngremi Pai ali agi menokteta yangluba nisung jenjang tashi Kotak chuba menden doktsür nisung dak Shi azü ajak nung yangsema tetsür ka ajanga sensakpu ka dang nungia tilaba küma nashi ki ka nung sor kinü nungi kangki nung angenloka masü. Tashi asen memchirtem nem mezüingmeshi dakja asen menenpurtem Pa dak amangbapurtem agi Tsüngrem chir akümstsü. Ain agüja Kotak talidaki ajungketa tanelar temoatsü tem ajak agi moatsür.Tanela Temeshi agi seal ajener Kotak nung teti tatem makai Trinity rongnung asenoka tendakjang ta Yisui sarasademsüba meim indang laitem ya azüingdang Christmas ya amata tatalokba masü, ya alima benjongbentsü agi kübdoker ayutsüba tatalokba ka masü nisung ajaki iba chuba rongnung chubatiba asoba benjongmong yabo retreta mongdakjang ni ta ajaki sarasadema atadini ta tebilemba ka lemsateper. wish you Merry Christmas and happy new year.

DEBTS RECOVERY TRIBUNAL, GUWAHATI
 Government of India, Ministry of Finance
 Department of Financial Services (Banking Division)
 Suwarna Bhawan, House No.12, New Town Path, Near Hanuman Mandir,
 G.S. Road, Ulubari, Guwahati-781007.

NOTICE OF DEMAND TO THE CERTIFICATE DEBTOR (S)
 (See Sections 25 to Section 29 of the Recovery of Debts Due to Banks and
 Financial Institutions Act, 1993 and under Rule 2 of Second Schedule of the
 Income Tax Act, 1961)
 RC. No.86/2019

State Bank of India -Vs.- M/s Asha Motors & Ors.

To,
 1. Messers Asha Motors Ghosh, KHERMAHAL NEAR POLICE POINT,
 Dimapur, Nagaland.
 2. SHRI VICKY GHOSH, House No.108 Khermahal Dimapur, Nagaland-797112
 3. SHRI PIWOKA CHISHO, Son of Kikheto Chisho Signal basti Ward
 no.16 District Dimapur Nagaland-797112

Tsüinglanglen agüja aliba ama Ld. Presiding Office ajanga 27.08.2019 nü case
 No. O.A.70/2019 nung agütsüba ama nenok dang nungi Rs.29,25,212.22 (Rupees
 Twenty Nine Lakhs Twenty Five Thousand Two Hundred Twelve and Paisa Twenty
 Two only) angütsü kuli agütsür.

1. Amount due as per the Recovery Certificate:	Rs. 23,41,297.29
2. Interest from 26.02.2019 to 05.05.2021 @12.50% P.A.	Rs. 7,07,914.93
3. Costs	Rs.26,000.00
	Rs. 30,75,212.20
Less Recovery (-)	Rs. 1,50,000.00
TOTAL:-	Rs. 29,25,212.00

2. Iba sangdong agütsüba nungi anogo 15 tsüingda sen agütsütsü tetuyuba
 agütsür aser magütsüra Recovery of Debts Due to Banks and Financial
 Institutions Act, 1993 nung Sections 25 nungi Section 29 aser Second
 Schedule of the Income Tax Act, 1961 nung Rule 2 kübok sen meyipa agütsü.

3. Iba sen dak alia nenokisa
 (a) date of realization nungi recovery certificate agütsüba sülen (RC No.86/ 2019)
 nungi recovery certificate nung aliba ama sen tetemlok agütsütsü aser (b)
 notices aser warrants asr tanga maparen inyakba nung sen edokba ajak
 menoktsü.

GIVEN UNDER MY HAND AND SEAL ON 7TH DAY OF AUGUST, 2021.
 (S. KUMAR)
 RECOVERY OFFICER
 Debts Recovery Tribunal, Guwahati.



TIR YIMYIM YIMOBILEM (EDITORIAL)

DIMAPUR YANGTEPNÜ, LUCHEI (DECEMBER) 23, 2021

Temeim jungkai adokdaksüba

Meimdi asüyonga temeimsü maket, tashi manga, peisasa pei taküm mazüoktetter, awashi memetet, tiyazüang jembir ta asüba nisung dang temeim koda sayutettsü? Nüngdak ajak repringteta yaripet yarir, mapa ajak nung tajangzük agütsür aser aibelenyonga aremzüker, saka kecha hau ta mali, peisasa alir ama bilema ngasangatema alir ta asüba nisung dang temeim koda sayutsü? Nisung dak aliba shisatsü agibo item ama temeimsü maketba nisungtem dangbo temeim mesayutettsü. Ajisüaka, shitakba temeimjibo temeimsüka asüba agi meimbaji masü saka tesempakatsü asüyonga odang meimbaji shitakba temeim lir. Iba temeimji Tsüngrem temeim lir aser asenok Pa dak amangertem daka iba kasa temeim alitsüba Tsüngremi asenok dang nungi akanger. Laishiba nung, iba Tsüngrem temeim indang bilemdangba aser asadanga nisungtem rongnung Yisu nütsüng Yohan-a ka liasü ta angatetter. Aji oda, pai Yisu Khrista alimai nisung kümer aruba indang ya bilemdang dang, Tsüngremi alima meimchirtem tesempatsü temenen mapatem ajanga mesamadaksünüi kanga meimba agi, Pa ajaso chir Yisu Khrista alimai yok ta Yohan 3:16 nung shia angur. Iba Tsüngrem temeimji Yohan-i asadang saka masadangtet, anungji "Tsüngremi alima odang meim," ta dang pai asadangtet. 'Odang meim' tetezü meimtsüsa kecha agia langa mali asü, saka angati taochi agi meim. Ibayongji, asenoki ken nunga 'Tsüngrem taochi yabo asenok menen danga taoba,' ta atener. Tetezü, seret nung Tsüngrem taochi ya külen aser asen temenen külen ta enoker odangra, Tsüngrem taochiji kanga agia taretba asütsü. Ashi, asenok menen yaribo asen tanüla dang masü saka temanga dena samar tanü asenok alima nung ya melila. Iba ama angati anguba temeim tulu indangji tenyar Yohan-i bilemdangdang, Tsüngrem ya temeim ta angatet. Iba jagi 1 Yohan 4:8 nung pai ashir, 'Tsüngrem temeim lir.' Iba Tsüngrem temeimji nisung rongnung, parnok tenük agia ngua aser teben agia amdangteta ta jungkai adoka sayuba mapaji Tsüngremi Pa chir Yisu Khrista alimai yokbaji lir ta kasa 1 Yohan 4:9 nung shia angutsü. Yohani asenok nem tali tejangjaba angatetdaksünübaji, Tsüngrem temim jungkai adokba mapa ya lir. Aji oda, paisa 1 Yohan 4:7 nungi 12 tashi nung Tsüngremi meimba ama, asenok rongnunga kati ka den meimtepra, ibaji asen taküm ajanga Tsüngrem temeim jungkai adokdaksür asütsü ta angatetdaksünüa züluba asenoki angur. Tenyar Yohan-i asenok dang Tsüngrem temeim jungkai adokba indang ashiba ya asenok asoshi Christmas osang lir. Christmas anogo nung tesempatsü nisung tamajungertem rongnung Tsüngrem temeim jungkai adok. Iba temeim jagi kodang, takar nisung dak kongshi pai pa akaba kecha mapayui toktsü aser Yisu sülen anidak. Kasa temeim jagisa kodang tular aser takar nisung Zakia ama dak kongshi, pai Yisu tsüngdang pa akaba tesadang ka sensakertem nem agütsütsü nangzük aser tim masüba nung tangar dang rakzuka agiba rongsen lira, parnok nemjibo pezüsü agi temloker agütsütsü mulungtetba Luke tapu 19 nung shia aliba asenoki angur. Atangji, tenyar Yohani ashiba ama, Tsüngrem ya temeim lir, anungji kodang asenoki iba Tsüngrem temeimji agizükdir, asenok taküma temeim agi sünga akümer. Anungji, asenoki tanüla samaa aliba atema temulung shiranga bilemer aser khuret abener, aser asenoki asen akaba agi nüngdakba purtem yariner. Aji oda, kodang asenok dak Tsüngrem temeim lidir, asenoki tangar meyong tim masüba lenmang nungi agizüka agitsü bilemetsü melena asenoki angur enoksemer agütsünür. Tsüngremi Pa temeim asenok tenük agi angutsüsa jungkai adoka sayuba ama, asenokia asenok dak Tsüngrem temeim alibaji jungkai adoka sayutsü Tsüngrem o agi ajungshir. Asenok dak temeimbo lir saka iba temeimji jungkai adoka tangar dang mesayutetra, temeimji temeim masü akümtsü. Atangji, yangi tamalen shisemba ama, Christmas ya temeimsüka asüba purtem dang meimba Christmas masü saka temeimsü maket, tesempatsü aketba purtem kümzüksü asoshi meimba Christmas lir. Iba tangatetba nung, asenokia temeimsü maketba purtem taküm aser tanüla karbo kümzüktsüsa temeim sayutettsü atema iba Tsüngrem temeim tashiji meshidi. Iba tashiji medeni asenokibo Tsüngremi asen dang odang meimba ama, tangar dangbo odangbo memeimtettsü. Iba temeim yabo tang ama Christmas mapang, asenok jungtepa aser meimtepa alirtem rongnung lemsatepba temeim dang nungi kanga agia tuluba aser taoba. Iba temeim jagibo tular, aka maka, amang sangwa, timtem ali mali kecha mali, timtemba purtem odang yariner, atsüngzuka oa alirtem bushia oa ajungshir aser samaa aliba tanülatem odang kümzükner. Atangji, iba temeimji Tsüngrem temeim lir, iba temeimji asen dak melira, tenyar Yohani ashir, asenok dak Tsüngrem mali.

OLEMSABANG

Christmas Tayongzükba Rongsen Arentsü Tajangzük Bushiba Tendak Christmas Tetezü Repringshidi (Mark 1:3)

~ Dr. Lipoknenla Ozukum

Tamasa nenok ajak dangi Advent Christmas salem lemsateper.

Advent Christmas mungpu nung, Joseph Mohr-i mejemba ken, "temeshi, tesüngjem aonung" ya kanga bulua atener. Iba ken ya kanga tetezü tulu lir. Aiben advent Christmas mungpu nung, iba ken ya atandang aser angadang iba tetezü ya asen Naga nunger advent Christmas renemshiba tendak metemdangdang kanga dang temulung ayanger. Tanü asenok advent Christmas tendak, rongsen arentsü tajangzük bushiba (commercialization) asaprang ola tuluba kümogo. Iba tendak nung, temeshi, tesüngjem aonung ta asüba tetezü tajung sama odar. Au! Christmas dak sendakba Christmas decoration, chiyungtsü tajung, süoshi tajung, agütsütepba item ajakji Christmas indang nung shilem lir. Saka tanü asen putu tendak, tebilemetsü kaji, commercial lima-i Christmas mungpuji puetogu. October ita nungi online advertisement sale balala ajanga tali tali alitsüba ajungshir. Itemji mali tashi temulung ani mesüngzüker. Anungji Christmas tenüng nung sale mademdang takar sensaker kecha tebandang mali tali aliteper aser tali entoker. Ano yamaji, rongsen arentsü tajangzük bushiba tendak nung, Christmas indang tuyodakbaji Emmauel, Tsüngrem asen den lir masü saka Santa clause, snow man, reindeer, chiyungtsü tajung, Christmas decoration, sobu-solemetsü toktepa mungpu ka kümogo. Iba tendak kong temeshi aser tesüngjem lir?

Rongsen arentsü aser tajangzük bushiba tendak, kümshi Christmas tetezü melenshia aor. Khristan teimla nung amenloker koma kija taküm aser kibong renema atatsü ta masü saka koma tangar dak nungi toktepa ajisüktepa sobu-solemetsü sobutsü, chiyungtsü aser decoration yanglutsü ta asüba tuluba kümogo. Bethlehem nung Yisu Khrista asotsü asoshi tanendak mali liasü ta asübaji tanü asen advent Christmas tendak shishilembaba aser parking lot nung tanendak mali kümogo. Iba yongji kibong aika nung Christmas temer sentsüh aotsü shisabuluteper, sen apuba dak sentakba nüngsen, o totep tali bulushitepa jembir, tali merumerua bülemba yong temang mejungi akümer, kibong kar nungbo balalula adoker, a.a. Aya! Khristaji Christmas nungi samadar. Asenoki Christmas ya tashi ajema kümduksü na? Tanelaren terenemshiba dang nungi shi/temang taginütsü tuluba kümogo. Iba tangatetba kisung nung dang Christmas among nungbo tanga tamangba yimsü nüburtemi Christmas amongba aser asenok tamangertem kecha tepila mali akümtsü.

Advent Christmas ta asüba ya Yisu Khrista arutsüba ataba aser renemshiba mapang lir. Mezüngbuba nung, Yisu alimai aruba bilemteta taküm renemshiba mapang lir. Tanabuba nung, pei temulungjang renema pa tanaben alimai arutsü yongya ataba mapang lir. Khristanem atema advent mungpu ya kanga dang tontibang lir. Iba tendak, Mark 1:3 nung "lisem lima nung kati ayimtena aliba ola. Nenoki Kibuba lenmang renemang; pa lenkung metong metonga yangluang." Iba osang ya, advent Christmas mungpu nung rongsen arentsü tajangzük bushiba tendak kanga tapet lir. Lisem lima nung ta asübaji azoükba noksa lir. Nenoki kibuba lenmang yangluang ta asübaji Pa atema tesütep metameyong yanglutsüba indang ashir. Lemangji kari lenmang masü saka asenok taküm aser temulungjang renemshitsüba ashir. Advent mungpu renema ataba mapang nung, Christmas tetezü repringshidi.

Alima melenshiba yari, kümshi Christmas mungpu nung rongsen arentsü tajangzük bushiba yabo tuluba, tajungba aser terenlokba dang akümtsü anungji iba nungi pilaa alitsüba ashir masü saka Khristan kati Christmas tetezü aser alima rongsenren tajangzük inyakyim kanga junga liru medemteta ataba Khristan ka asütsüla.

Koma renemtsü?

- 1) Rongsen arentsü tajangzük bushiba Christmas asaprang ola tendak, Mark 1:3a nung "lisem lima" koba azoükba noksa sayur ibaji asen nükla nung bilemtetdi. Tendaka angartem (active listener) asütsüla mesüra Christmas mungpu nung, rongsen arentsü tajangzük bushiba asaprang olaji Tsüngrem O dang nungi tuluba asütsü. Anungji tendaka angatsü atema azoükba nüngdaker.
- 2) Rongsen arentsü tajangzük bushiba tendak, Pa lenkung metong metonga yangluang (Mark 1:3c) Yisu atema lenkung metong metonga yanglutsütsü atema, Khristan ketdangsür (steward) tangatetba nung Christmas ataba nübur asütsüla. Rongsen arentsü tajangzük bushiba Christmas tendak, Khristanem aikati nüngdakba aser taginüba mebendangteti aliteper iba yongji asenok tamangertem Christmas mapang talira entoker. Chiyungtsü tali lalur, Christmas decoration tenüng nung süngdonglidong tali aleper, fire crackers tali bulutepa pokteper. Iba ajanga metameyong raksatsür aser melentsür. Anungji, Khristan ketdangsür tajung ka ama, tanguba aser tenükshiba ajunga alitsüba, inyaksüba masü saka nüngdakba aser taginüba bendangtetba taküm ka asütsüla aser yamaji temeket/metameyongji (environment) kanga junga anepalua kümzuka pei ajung atema masü saka Tsüngrem sentsüwangshi asoshi kümzuka ayutsüla aji asü nungang pa lenkung metongmetonga tesütep metameyong yanglur rongnung shilem agir asütsü.
- 3) Rongsen arentsü tajangzük bushiba tendak, nenoki Kibuba lenmang renemang (Mark 1:3b) iba ya khen junga shisadangdi. Kibuba lenmang renemtsü asoshi, consumption dang nungibo Tsüngrem aser nisung den tesendaktep tajung ayutsüba aser temeket/metameyong kümduanga anepalua ayuba nung tali temulung agütsüba ajanga Kibuba lenmang renema ataba nung shilem agir asütsü.

Asenokia iba 2021 Christmas benjongmong koma bilemtetner? Sentsüh atsüba Christmas? Rongsen arentsü tajangzük bushiba tendak, asaprang ola agi Tsüngrem O magashi kümduksü asü?? Sen agi Christmas omen teimla, tepela, temeim, yimjung alitsü meranger asü? Khristan ketdangsür tangatetba nung Christmas ataba taküm ka asütsü? Christmas tetezü aser alima rongsenren tajangzük inyakyim liru medemtetba asütsü?

Christmas ya kenü tatalokba anogo ka masü saka anogo shiaji Christmas anogo ama agidi. Mark 1:3 nung ashiba ama, nenoki Kibuba lenmang renemang, pa lenkung metong metonga yangluang ta asüba ya asenoki anogoshi arok aroka bilemdangdi. Anogo shi sarasademdang, asenoki ya asüngdangti, kü takümi koma Kibuba lenmang renemer? Aser asenoki koda tangar dang ibaji asen taküm ajanga sayur? Aji asü nungang, rongsen arentsü tajangzük bushiba tendak asenoki Christmas tetezü tali jangjashitsü. ken mejemer Joseph Mohr-i mejemba ken, "temeshi, tesüngjem aonung," ta asüba ken tetezü tuluji asen taküm, kibong nung atangji kümduksüdi ta ayongsüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Temipangba Sü Indoktsütsü Asoshi Yisu Khrista Alimai Aru

By Mrs. T. Kikanaro Jamir, Retd H/M Signal AngamiDimapur.

2 Korint3:16 "Saka kodangsa nisung kati kibuba dangi meyipdir temipangbaji agizüka adoker."

Temipangba süji tejenba putu tensa yimsü den medemdangra, Yisu Khrista alimai arubaji temipangba Süji indoktsütsü asoshi aruba angutsü. Ano iba ya temulungjang meyipdaksütsü aser lapokdaksütsü asoshi Yisu dak tashi lir ta sayur aser iba inyakyim ajanga na aser ni tanüla saksü, taküm kümzüksü maparen tuyur. Tejak memiipang tetezü asen temulung sentsü merüktetsüba, tanüla tamang agi kodang Khrista ajurudir pa taküm sentsü wangshi menden tashi kotak atongtsü nükla sayur. Temipangba sü indoktsütsü nisung dakbo tashi mali.

Mezüngbuba nung asenoki Mosa aser ozüng tsüngda nung Tsüngremer tenangzüktepba jongkai atokba angur. Yamaji temipangba sü ka Tsüngrem aser nisung tsüngda nung liasü. Kong Tsüngremer Mosa taküm instrument ka ama amshiba yangi angur. Mosa chuba kidang wazüka, kümzüka yutsubaji Tsüngrem tebelemba, sendong rongnung tulutibaka asenoki angutsü. Saka Mosa kodang alima shisatsü nung tain aküm, Pai chuba sobotsü lozüka ayutsüsa aküm. Mosai pi identity aser tesentaktep tajung par nuburtem dang sayutsü merandang. Aji süaka pa jena aotsüsang kuma adok aser joko pa arempok nung jenoktsüsa aküm. Saka yangjia Tsüngremer pa bushiyonga aruba asenoki angur. Tsüngremer temaisü ka Mosa dang sayu, aji Mi jangrua süngsem rongnungji poktetsütsü. Anungji Mosai koba tereprangtsü tuluji reprangi ao, idangji iba süngsem teyung nungi Tsüngremer pa den jembitsü tenzük. Tsüngremer Pei sasa temaisü ajanga Mosa den jembis aser iba inyakyim ya Tsüngremer maparen (process) ka ken ka ken ta metetdaksüba mapa liasü.

Temeim adianutem Tsüngremer nü nem nungloksüba wadang nungji takok, tamakok ajurua na arangshidaksütsü Pai na putu ka mesüra putu ana asoshi na ajaba ta belemtetangma. Anitet 3: 6 Ano Pai ashi Ni nü tsürabur Tsüngrem, Abraham Tsüngrem, Isak Tsüngrem, aser Yakob Tsüngrem. Aser Mosai pei tejak miim, kechiaser pai Tsüngrem dak reprangtsü tsübu. Aji süaka Tsüngremer pa sentsü melentsüba angudang Israel chirnurtemi Tsüngrem inyak yim mapa angatet. Kechiaser pa tajabaji alar tia nung aliba nüburtem anitetsü asoshi nungloksüba mapang liasü.

Saka kodang asenoki Isaia kaket nungji reprangdir Tsüngremer ochi pukemer shinga mangu, ochi laoadoker liasü anungji Tsüngrem jashia adokba yangi angur. Tsüngremer pi teka agi, Pai temeshiba ajungket aser pei ket agi pai tekümtet bener aru. Iba putu tensa ainkar liasü. Isaia 59:17 nung ya zülua lir. Tsüngremer pei sasa tuku semoktsü asoshi pai temeshiba sobu, aser pa kolak nung tekümtet merang korang, aser suoshi asoshi pai mangyangba sü aben aser tema sepoktsü tejangraba sobua liasü. Kechiaser Tsüngrem ket nung Pa indang kaket liasü, Tsüngremer temenen tongpang nung raratsü asoshi temeshi Jong amer hon süngkümpang nung noktaka liasü.

Ochi meyong Tsüngrem chir Khrista meimchir kümzüksü asoshi angati sempet ka ama alimai renemeteter yok. Yisui koba sobotsü sobur alimai alu iba tolaji tarung makai, tema nungi tatem tashi tatakba liasü. Iba tetezü alima ajonga pa tapubang nung ajungket aser arakmoka pa ain tashi agi bener iba alimai aruba sayur. Mati 1: 21 nung yamai shia lir. Lai jabaso ka asotsü, aser nai pa tenüng yisu ta ajatsü, kechiaser pai pei pur parnok temenen nungi kümzüksü.

Arung tembartem asenoki tasüta mulungsoa Pa dangi odi, asen mulungsentsü renemdi. Aseni alima mekokra Tsüngrem tsüngdang sentsü lir ta belemdi. Taruba Christmas nai aser ni ajurutsü asü memetet? Senti mapang tajungtibaji na asoshi ya alitsü. Asen kümtetdakba Tsüngrem chir Yisu khrista asen mulungjang nung sodaktsüdi, asen mulungsentsü nung Pa Uludaktsüdi. Pa den sensaksemdi, Pa yimjung chuba chir asen menen pongitsü asoshi pai renemer alimai aru. Asen mulungjangi pa aiddaktsüra Pai na anitsü aser nü madang yimsü asütsü. Nai mulunger asü? Yamaji temipangba sü indoktsütsü asoshi Yisu Khrista alimai arur. Na shirang yipden nung alidanga nai ola tila agi mepeshiba pai angashiogo aser langzüogo, belemdangangma.

Tekümtet jong Yisui numadang tongloksüba to nu kiyonger, tembar dang koli suangma. Koba lung kong pai metong metonga yanglutsu iba indang kuli asutsu asoshi yisui na wazüka yutsü ta belemtettsüla. State ka nungi state ka ajanga na shirang yipden nung bener hospital ka nungi hospital ka, ain agi na aneptsüba Tsüngrem tashi nu den lir Pa tenüng sangang. Na meyipa nur limai yokba, nu litsü, nur meshizüng nung nokdaksütsüba tesüngmangtsü Tsüngrem taochi mapa ka masü no? Alima meimchir ajaki tila kümer temokok ajak agi apudaka Yisu kulemdi aser pa tenzüktsü mulungsoa lidi. Kechiaser Pai dang asen mulungjang nungi temipangba sü indoktsütsü. Yisu dang shidi arung. Pa jangchi lung, mainshi lungzük titi tatem maka. Halleluya. AMEN.

ANO GO ABEN TSÜNGREM DEN

TSÜNGREMER TAOCHI AMSHIBA

Nisung shiai sempet agizükba ama, aji agi Tsüngrem taochi jenti meyong ketdangpurtem tajung ama, nenok medemer o medemer na yaritepang. 1 Peter 4:10

Tatembangji koda arutsü Peteri lemsatepba liasü. Khrista tabensa taküm ali, aser ajak asoshi asü. Shirnoki osangtajungji angashia lir parnok taküm junga aser temenen memenai alitsüba dang masü saka Khrista tanaben arudang tatem bendangba nungi kümzüksü. Tang pai tamanger taküm koda junga alitsü iba indang ashir. Mapa ajak Khrista ajanga Tsüngrem sentsüwangshidaksütsü asoshi kari o jembira, pai Tsüngrem otem ama jembiang, kari tenzükra Tsüngremer agütsüba tashi ama inyakang. Idangji pai sempettem agizükba indang jembis. Pauli aiben tanela sempettem indang jembis (Rom 12, 1 Kor. 12), aser shibai Khrista agizüka lir pai pei agizükba sempetji jangjaa amshitsü ashi.

Tanü asenoka Khristan ka ama, Tsüngrem sempet balaka agizüka lir. Kodang asenoki temenen nangzüka amangdir idangjisa Tanela Temeshi dang agizüker masü, saka Tsüngrem sempet temeja agizüker. Asenok nisung shia balala ama Tsüngremer nisung shia nem sempet balala temeja yangluja kar. Asenoki kati ka tenzüktsüla. Khristan taküm nung ibaji taküm lidaktsüba teraji lir. Tangar nungdak nung yaritsüba, tamanger aser mamanger ajak. Kodang asenoki iba sempet Tsüngremer bilemba ama amshidir, asenok ketdangsür tajung ka ama kuli sayur, Tsüngrem taochi tangar dang sayuba jagi Pa taochi amshir tajung ka ta sayur. Asenoki tangar tenzükba nung iba taochi anogo shia amshitsüla.

Tsüngrem, kü nem sempet agütsüba asoshi Ne tenüng asanger. Ni iba sempet shisa kaa amshitsü yariang. Amen.

ATEPZÜNG NUNG ALIRI PETINU MANGU

~ Wati Longchar (Serampore)

Alima ajunga nung Covid-19 ajanga küm anabuba akhi mapang ama Christmas temulung sadoka longsoa memungteter, kechiaser alima nungi Covid tashitak mao. Kibong aika nung tsürabur, chirnur, adianu dipu limai pilaa oadoker azüngmeyaka temulung zürepa Christmas süidaksütsü; kibong kar nungbo sensak ajanga tanur nem aben süoshi tasen malitetsüi mesüra chiyungtsü alitsü sen maka süidaksütsü. Atangji, yimti-yimdong nung decoration yangluba dak alaka taoba kümtem ama longso tepa telok mechiyungteptsü/süngo jemteptsü, kibok-kisem, wawa-menü, sai-sapong makatetsü. Süra iba ama tensa ka nung Christmas koda amongtsü?

Yisu Khrista asoba indang Osangtajung zülur ajaki nükjidong balala nung zülü. Parnoki ashiba nükjidong ajakji tanü asen tensa den kanga dang mesüktepa angur. Parnoki amongba amaji asenoki Christmas amongba ajanga Tsüngrem tali sentsüwangshidaksütsü akok.

Yisu putu nübur telok ana lemsaa liasü. Telok kaji telemetba agir, ozüng latetsür, ratetsür, yamai inyakang ta sayur, parnok dangji "people at the centre" or "people within the power structure" ta aja. Parnokji lokti tanishir, takar, aser parnok dak yimden tashi liasü. Parnoki bilem, Yisu Khristaji parnok ama takar kibong, chuba mesüra tashitemeteter kibong ka nung asotsü ta imlaa yongyasetta ata. Telok kaji tanitaker telok, alar, angupur, sannüker, aluyimer, hachirawala parnok dangji "people in the margins" mesüra "people outside the power structure" ta ajar. Takar aser yimsüsüri ochimashi inyakba ajanga sensaker aika taya agi asü. Ochimashi tax 51-55% agütsütsüsa aküm. 15% mapa mali (Nagaland nung 24% mapa mali ta ashir), parnoki arishi küm 28 tashi (average life expectancy) dang liasü. Anungji Osangtajung zülur Luk nükjidongji item lokti nung jentoka alir nüchiso aser tekümtet asoshi Khrista meimchir aküm ta sayu. Tanendak room mali, nashi tsük mejakba aosu, moapu nung aliba sannüker (parnok ki maka, ali maka, mamatzü aser shiruru ayokba agi taküm ali) dang kotak tenyari Yisu asoba sangoktsü. Tenyar jagi moapu nung sannüker dang ashi, "Tetsüba kechiaser ajiang, ni nenok dangi tepelatsü osangtajung tulu bener arutsür. Kechiaser tanü nenok nem Dawid yimti nung Kümtetdakba ka soja lir, paji Kibuba Khrista lir" Luk 2:10-11. Sannükertemi, bendang lima talang nung oa aliri petinu ngua kinü Yisu arua külem, saka pei yimti Bethlehem nung alirtemi petinujji mangu kechiaser Yisu nashi ki nungang liasü. Yimsüsür aser takartemi sensaker tenüki mangu. Sensaker meyarinüba, asüküm, rongsen meimba, pei tashi dak temulung alemba, taka shisangba ajanga parnok tenüki sentsüprang petinujji mangu. Tsüngrem atangji sensaker rongnung jungkai adok, aser tanü parnok nüchiso asoshi maneni inyak. Christmas temoatsü aginera, tanü asen tendak kechiba nübur timatemer, kechiba nüburtem mapa mali alitsüsa akümer, tangar state memenepe iba jenjang nung alitsüsa akümer? Item ajak ya ochimashi mapa ajanga ta angatetdi. Temulung meyipa ochi dangi meyipba agi Yisu Khrista sentsüwangshidaksür.

Osangtajung zülur Yohan-ia Yisu Khristaji tematiba Tsüngrem aser meimchir taküm ka iba lima koda alitsü, koma inyak nung alima dangi yimchiyimchung, tepela aser tesünep bener arutsütsü, kechi inyak nung nisung keta senzüka meyutsüi lirumedem adokdaksütsü aji jungkai adoka mapa agi sayutsü aru. Yohani kotak jenjang ajangzüknera alima nung temeim aser ochi mapa inyaktsüla ta sayu kechiaser Yisu Khrista temeim aser ochi mapa ajanga alima melenshidaksü. Temelenshi adokdaksütsü atema temeim mapa aser ochi inyakba ajanga dang alima nung temelenshi bener arutet. Tenyar Yohani Yisu asoba indang yamaji angatet. Tanüa temeim aser ochi mapa agi kuli mesütetra Christmasji longsolopen ka dang akümtsü.

Osangtajung zülur Mathi-bo Yisu jakzüka tera aika shir külen tashi temeteteteri semdangba shia angur. Yihuda nungertemi Yisu Khrista ya kanga dang merumerua parnok indang dang amai bilem; parnok tekümtet asoshi dang aru ta bilem. Ajemalutsü melena asüküma bilem aser jembis. Bendangertem jentok aser mojing chirtem ta luja jembis. Bendanger kintemji tiyazü Tsüngrem külemertem ta mezüngmeshi. Bendanger dang masü, jakzüka aruba tera nungji tetsürbo mezüngok aser jentok. Anungji iba tangatetbaji tai ta sayutsü asoshi tebur, tetsür, bendanger, Yihuda nunger, nüktapangdar, tetepseter ajak zülua angur. Yisu Khristaji meimchir ajak, Yihuda nunger dang masü, tekümtet asoshi aru ta sayutsü nükjidong nung yamaji zülü. Jakzüka aruba tera indangji shir külen, Yihuda nunger, kiyonger, tulur-tashiri arua kinü tanur semdangba indang masü, saka bendang lima balala nungi tashi temeteteteri Yisu arua semdangba shia angur, "...onoki pa petinu anüdoklen adoka angu aser pa külemtsü aru" Mathi 2:2. Yihuda nungeri Bethlehem nung Yisu soa alibaji memetet; petinujji mangu. Parnok meruru, ampangyim, taka, tashi toktepba agi nükpoker kümer liasü. Saka bendangertemiang petinu tama angu. Tetezü, Yisu Khrista shiba meimchir ajak tekümtet asoshi aru, saka asenok tenüng agi dang Khristan ta sür lira, temeim aser ochi mapa meinyaktetra Christmas temoatsü bendanger aser tanga yimsü amangerangtemiang agiadoktsü. Khristan ta tenüng jar aliba jagi teperi masü. Yisu Khrista alima rangpen asoshi aru, shinga züngdoktsü makok. Asen atepzüng nung Khrista soa alibaji ajurnera shinga tezüngdok, sen, tashi dak temulung melemlü. Ajemalu aser ochi mapa agi Khrista külemdi.

Yisu Khrista putu, Palistine lima Rom nunger yimsüsüba kübok arakmoka liasü. Rom yimsüsüba dak alaka tanga temaba yimsüsüba mali liasü. Tashiyim amshia yimsü asübaji hau ta amangdaksütsü atema, Rom chuba Tsüngrem mesükba nung yanglu. Meimchir kümzüksü Rom chuba Tsüngremer alimai yok aser pa yimsüsüba kübok alima ajonga anir aittsü aser pa yimlaji tatem maka alitsü, anungji chuba madang apudaka külemtsüla ta ozüng agütsü. Chubaji tenük agi anguba Tsüngrem, anungji paji külemtsüla aser pai kechi jembizüka yoker aji Tsüngrem O ta nüburtem dang sayu. Chuba anema jembibaji Tsüngrem anema jembiba ta angateta parnokji kangki nung meta (Tejen Lai putu lung agi onseta entok). Yisu nütsüngtemia Rom yimlaji ama, Yihuda yimlaji Yisui anir yangertsü ta angatet. Yisu nütsüng ana, Zebedee chir Yakob o Yohan natia kasaji angatet. Yisu dang tenati kodang na chuba menden nung mendir, ka tachichi aser ka tabelen ta amentsü maongka agüjang ta miima ashiba angur. Iba amaji alima konang, tashi toktepba, anemtepa agi alima sünger liasü. Anungji Marki iba tangatetbaji tai ta sayutsü, Marki Yohan baptitsüba ashiba o, "Kü dang nungi kanga agi tuluba ka kü sülen arudar, oda nibo mokrema lur pa süngsem lisü salatsüa metemsü" (Mark 1:7) alima yimden yimlaji tashi Tsüngrem kümdaksütsüba tai ta angatetdaksü. Alima yimden yimlaji den Tsüngrem yimlaji asadangtsü makok. Iba Tsüngrem yimlaji nung tenzükter ka sünera, Yisui pa nütsüngtem dang ashi, "Saka nenok rongnung yamaji malitsü; saka nenok rongnung shibai mezüngbuba kümner, pa ajak lar asütsü. Kechiyong atangji Nisung Chir-a sünga pei tenzükdaksütsü atema masü, saka tenzüktsü aser aika alang pei taküm agütsütsü aru" (Mk. 10:43-45). Tetezü, tila akümba aser ajemalu akatsüba indang ashir. Shibai tilatiba kümer nübur ochi nung tenzüktsü ajemalu aser temeim shisatsü kua ta temulungjang bushiba ajanga chichiba Christmasji ataloktsür.

Covid wara mapang longso-lungpen, chia-ajemba akhi ama mesütetaka temulung meyipa teyanglushiba mapang ka, sarasadema aser ajemalu nung Tsüngrem sentsüwangshidaksüba mapang ka südaksüdi. Tsüngremer jendokba pur rongnung jungkai adok asü nung, yangji tanüa Tsüngrem lir. Asenoki parnok dangi odi aser ochi aser temeim inyakba agi Tsüngrem nükjidongji atalokdaksüdi. Sensaker meyarinüba, asüküm, rongsen meimba, pei tashi dak temulung alemba, taka shisangba ajanga sentsüprang petinujji mangutsü. Ajemalu, temeim aser ochi tenük agi dang petinueji angutsü akok..

OLONG PAITEP # 6035

1			2			3		4		
					5					
		6								
							7			
		8								
9										10
				11		12				
13										
14						15				

TIPILEN		LANGTSÜNGLEN	
1. Chiyungtsü oksa	- (5)	1. An tetsü	- (5)
3. Tatalokbatem	- (5)	2. Juzüa senzüba shiruru	- (7)
5. Tama	- (6)	3. Tamendakdak	- (4)
6. Pei meyong aküm	- (3)	4. Tiak-asang	- (6)
7. _ _ _ _ bang	- (4)	7. Tasa	- (7)
8. Kinungpurtem	- (7)	8. Süngjang telung nung aliba	- (6)
9. Nokdak masü	- (4)	10. Ibai masü	- (5)
12. _ _ _ la	- (3)	11. Ano mamen	- (4)
13. Ochi masü	- (6)		
14. Yagi Sü ataker	- (5)		
15. Temadok	- (5)		

OLONG PAITEP # 6034 TELANGZÜBA

TIPILEN :	LANGTSÜNGLEN :
1. Kasa, 6. Rangben, 7. Mait,	1. Khu, 2. Süjak, 3. Onük, 4. Oba,
9. Poktet, 11. Ati, 13. Atasa, 16. Rür,	5. Anü, 6. Ratet, 7. Mozü, 8. Ita,
17. Rajang, 20. Lanu, 24. Nüngjem,	10. Tar, 12. Tinu, 14. Salem, 15. Aja,
25. Süra.	18. Anünü, 19. Taju, 21. Ano, 22. Onü,
	23. Kua.

Alokba office nungi yi agi meseper, kinungtsü tsübuseta shilangdang la nem melazükdaktsütsü atema ki tongli dang laptop lapoker mapa inyaker amai sayur.

Tebutsü : Na tanüa yi jemer shilanga na?
Alokba : Masüako masüako, ni shitak dang ako.
Tebutsü : Sürapangla kechiba briefcase lapoker nemshia sayur?
Alokba : Oh, sorry sorry!
Tebutsü : Alokba ati!

Lilir : WhatsApp

TANÜBO NAI LANGZÜANG

Q. Commonwealth championship nung Jhilli Dalabehera-i gold medal angu, süra koba asaya nung angu?
 [A] Archery [B] Shooting
 [C] Weight-Lifting [D] Boxing

===== (Taruba adok nung onoki langzüksü)
YASHI ADOK TELANGZÜBA : WHO

AO OSHI ANGAZÜKDAK:

TANÜ ANGAZÜKTSÜBA OJANG



Loli
 (n) Au tila agi temeseptsü tapok keta yangluba (small and short bamboo pipe)
 * Süngjangtzü aliba marok nung **loli** jioker meseper.
Loli
 (n) tezü nung talanglang atangba aonsotsü (long beans)
 * Ozü tsüki nung **loli** kanga atanger.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

NAI-A YA METETTER MA

DECEMBER 23 NÜ NÜNGTUKU NISUNG ASORTEM KAR :

- Finn Wolfhard, Actor (2002)
- Akihito, 125th Emperor of Japan (1933)
- Corey Haim, Actor (1971)
- Eddie Vedder, Singer-songwriter (1964)
- Joseph Smith Jr., Religious leader, Theologians (1805)
- Alexander I of Russia, Emperor of Russia (1777)
- Holly Madison, Author, Model, Reality TV Star (Birth Year: 1979)
- Charan Singh, Prime Minister of India (1902)

SUDOKU # 6075

TELANGZÜBA # 6074

		9	6		2			8	5	7	6	9	1	2	4	3				
5	2			7	1	6		4				9	2	6	4	5	3	7	8	1
8	6						7					4	3	1	2	8	7	5	9	6
	3	8			7	4		2				7	6	3	5	1	8	9	2	4
6		5	1	2	4	8		7				1	9	4	7	2	6	8	3	5
	4		3									5	8	2	3	4	9	6	1	7
	1		7	5								3	1	8	9	7	5	4	6	2
			2	4	3		1					6	4	5	8	3	2	1	7	9
2	5	6	8		9	7		3				2	7	9	1	6	4	3	5	8

OJANG LUTEP # 5621

- ITR : [][]
- MYIYIM : [][][][]
- NGAZÜER : [][][][][]
- AKAJ : [][][]
- NGDA : [][][]
- TAKHRIS : [][][][][]
- BAASO : [][][][]
- NJOBENG : [][][][][]
- EMSAL : [][][][]
- LETEPMSAER : [][][][][][][]

OJANG LUTEP TELANGZÜBA # 5620

TAMAJUNG DANG BILEMBA AJANGA TAKÜM NUNG TAJUNG INYAKTSÜ ASOSHI MERATETTER

TAN HOPTA ATEMA - KOMA SÜLA ?

Q. Nagaland government nung tatar yimsüsürtem ya Naga National Workers o India Government na tsüngda o tongdar aser teyariteper dang masü saka Naga yimten tebilemtsü ken o tembangtsü atema, India den tongti shilem agia Naga yimten ken o süoka jembir aküm nunga koma süla ?



December 22, 2021 nü Mumbai nung Maharashtra Vikas Aghadi lenirtem asükwa mongpu Maharashtra Legislative Assembly nung adentsü arudang parnoki Chhatrapati Shivaji Maharaj kürakyanglu nem akhüm agütsüba noksa nung angur.

Rajya Sabha nung bill 9 aser Lok Sabha nung bill 11 agizük

New Delhi, Luchii/ December 22 (Agencies): Asükwa mongpu Parliament November 29, 2021 nü tenzüka liasü aser Bodhbarnü tembangogo; Parliament senden ya December 23 nü tembangsü sentong liasü saka anogo ka jelia December 22 nü tembang, ta ketdangsertemi metetdaksü.

Union Parliamentary Affairs Minister, Pralhad Joshi-i, "Anogo 24 tsüngda senden 18 ben menogo. Lok Sabha nung senden shilem 82 aser Rajya Sabha senden shilem 47 amen. Rajya Sabha nung bill 9 agizük aser Lok Sabha nung bill 11 agizükogo," ta metetdaksü.

Ano külen Lok Sabha Speaker, Om Birla-i, coronavirus tensa atema ghonda 12 dak tema o lemtepa mapang nung MP 99-i shilem agia liasü, aser senden nung MP temi coronavirus wara nokdangtsü atema pepei tesem nung parnoki inyaka aruba lemsatop, ta metetdaksü.

Rajya Sabha senden nung tim mesüi benshiba atema Bodhbarnü Trinamool Congress (TMC) MP, Derek O'Brien Rajya Sabha nungi anentsü. Osang angazükba agi, Rajya Sabha nung Election Laws (Amendment) Bill, 2021 atema o lemtepa mapang nung O'Brien-i rule book ka reporters` table nung mereplokja liasü.

Mongolbarnü Lok Sabha nung Prohibition of Child Marriage (Amendment) Bill, 2021 nung o lemtepa liasü. Iba bill ya tetsür ka kibong akümtsü atema arrshi küm tajemtiba agi 18 aliba nungi arrshi küm 21 kümtsütsü nükjidong nung benok. Congress densema tanga opposition party temi iba bill anema nokdaka liasü.

Parliament nung Union Minister for Women & Child Development, Smriti Irani-i iba bill benok saka senden nung iba bill magizüki maneni o lemtepa asadangtsü atema Parliamentary Standing

Committee ka nem agütsüogo.

Rajya Sabha nung opposition MP 12 anentsüba atema anogo shia MP temi Parliament kima Mahatma Gandhi kürakyanglu anasa longkak aita liasü aser senden nunga kasa onük nung opposition-i longkak aitba ajanga senden aiben thinena liasü.

Lok Sabha nung aluyimba ozüing tasen asemprong agientsü atema Farm Laws Repeal bill benokba sülen minute ana tsüngda agizük aser Rajya Sabha nunga kasa bill agizükogo.

Tan Parliament nung agizükba bill tem rongnung Assisted Reproductive Technology Regulation Bill, High Courts & Supreme Court Judges (Salaries & Conditions of Service) Amendment Bill, Dam Safety Bill, 2019, Election Laws (Amendment) Bill, Narcotic Drugs & Psychotropic Substances (Amendment) Bill 2021, Delhi Special Police Establishment Amendment Bill 2021, Central Vigilance Commission Amendment Bill 2021, Surrogacy Regulation Bill, 2019 aser National Institute of Pharmaceutical Education & Research (Amendment) Bill densema lir.

India-i Pak, B'desh aser Afghan minorities 3,117 nem senso agütsü

New Delhi, December 22 (Agencies): Tesüiba küm pezü tsüngda India-i Pakistan, Bangladesh aser Afghanistan linüktem nungi minorities 3,117 nem senso agütsüogo, ta Bodhbarnü Rajya Sabha nung Minister of State for Home Affairs, Nityanand Rai-i metetdaksü.

MP, Dr. K Keshava Rao-i sorkar dang, 2018, 2019, 2020 aser 2021 kümtem nung Pakistan, Bangladesh aser Afghanistan nungi Hindu, Sikh, Jain aser Khristan minorities kwii India senso agütsü atema asüngdanga liasü, aser parnok kwi nem linük senso agütsü?, ta asüngdanga liasü.

Iba telangzübaji agütsüdang Rai-i, 2018, 2019, 2020 aser

2021 kümtem nung linük asem nungjagi Hindu, Sikh, Jain aser Khristan 8,244-i linük senso agütsü atema asüngdanga liasü, aser iba nungjagi India sorkari parnok 3,117 nem India senso agütsü, ta metetdaksü.

Ano 2018, 2019, 2020 aser 2021 kümtem nung linük asem nungjagi Hindu, Sikh, Jain aser Khristan kwii India nung jenoka alitsü atema mepishi, ta asüngdanga langzüdang Minister-i, tejenokdak asüngdangertem densema bendangertem dak sendakba ozüingtemji Foreigners Act, 1946, Registration of Foreigners Act, 1939, Passport (Entry into India) Act, 1920 aser Citizenship Act, 1955 nung shia lir, ta metetdaksü.

Karnataka state assembly nung anti-conversion bill benokogo

New Delhi, December 22 (Agencies): Mongolbarnü Karnataka Legislative Assembly nung anti-conversion ozüing benokba sülen state Chief Minister, Basavaraj Bommai-i, iba bill nung o lemteptsü atema maongka peria agütsütsü, ta metetdaksü.

State nung Khristantem aser opposition Congress-i iba bill anema nokdaker. Karnataka Protection of Right to Freedom of Religion Bill, 2021 ajanga tamangba yimsü mashie amangtsü atema temeden agütsütsü saka tashiyim amshia mesüra mesüzüka tamangba yimsü meyipdaksüba nokdangtsü.

State nung Khristantemibo, iba bill ya linük temzüing alema lir aser secular anema inyakba lir, ta aitsür. Iba bill ya agizüka ozüing kümra aibelenertembo küm 10 tashi tepuokdak ayutsü.

Belagavi nung osangbenertem den jembidang Chief Minister-i, "Assembly nung iba bill atema o lemteptsü benokba mapang nung maongka peria agütsütsü. Senden nung iba bill benokba mapang nung parnok (Opposition) maliasü. Iba ya sorkar tai masü," ta metetdaksü.

Mongolbarnü state assembly nung Karnataka Home Minister, Araga Jnanendra-i anti-conversion bill ya benoka liasü.

Karnataka Congress Tir, DK Shivakumar-i, "Ozü party-i anti-conversion bill anema nokdaker. Iba ya linük temzüing alema lir, anungji ni iba bill ji shisa-a indoktsü. Onoki iba bill benokbaji nokdangnüa liasü.

Parnoki majority ola angatsüla saka Speaker-ia sorkar den teka amteper inyaker. Onok iba bill anema nokdaksü," ta metetdaksü.

Iba bill benokba anema longkak aita Congress MLA temi senden nungi ayazüka ao. DK Shivakumar-ibo senden nung iba bill copy ka shisaa liasü.

Tamalen December 14 nü Karnataka Assembly nung Opposition Lenir, Siddaramaiah-i, iba bill ya yimsü ka (Khristan) anema inyaktsü nükjidong nung benoker, ta metetdakja liasü.

Osangbenertem den jembidang taoba mapang Chief Minister, Siddaramaiah-i, "Kangshia yimsü meyipdaksüba nokdangtsü atema ozüing ka lir. Kangshia yimsü meyipdaksüra sorkari parnok anema inyakang, ajisüaka tang benokba ozüing (anti-conversion bill) yabo yimsü ka anema benokba lir, anungji Congress-i iba bill anema nokdaksü," ta metetdakja liasü.

Belagavi nung tongti putir, Derek Fernandes-ia sorkari benokba anti-conversion bill ya Khristantem sempaba campaign ka lir, ta aitsüogo.

Janata Dal (Secular) (JDS) lenir, HD Kumaraswamy-ia, par party-i Karnataka Assembly nung anti-conversion Bill pumasemtsü, ta metetdaksüogo.

Osangbener den jembidang Kumaraswamy-i, "Iba bill ajanga shinga meyaritsü. Loktiliba nung telok kar raksatsütsü atema parnoki (BJP) iba bill benoker," ta aija liasü.

UAPA kübok nisung 4,690 apu aser iba nungjagi 149 aitsü: Centre

New Delhi, December 22 (Agencies): Kiralongra anemba ozüing- Unlawful Activities (Prevention) Act (UAPA) kübok tesüiba küm asem tsüngda linük tesem balala nung nisung 4,690 apu aser iba nungjagi nisung 149 aitsüogo, ta sorkari Rajya Sabha nung metetdaksü.

Rajya Sabha nung tasüngdanga ka langzüdang Union Minister of State for Home, Nityanand Rai-i, UAPA ozüing kübok 2018 küm nisung

1,421 apu, 2019 küm nisung 1,948 apu aser 2020 küm nisung 1,321 apu, ta metetdaksü.

Iba nungjagi 2018 küm nisung 35 aitsü, 2019 küm 34 aitsü aser 2020 küm nisung 80 aitsüogo, ta Union Minister-isa metetdaksü.

Judicial inyakyim nung ajemdaker parnok aitsüogo; ken o angadanga aruba, kuli bendenba aser kuli agütsürtem ken o asadanga nung ajemdaker parnok aitsü, ta paisa metetdaksü.



December 22, 2021 nü Ranchi nung aliba Hatia railway station nung health worker temi tangalen nungi arurtem dak coronavirus tendangtsü atema samples bendenba noksa nung angur.



Kuala Lumpur, Malaysia tezülen Shah Alam yimtsü Lion Club International 308B1 ajanga anüing nungi tangokba noksa ka nung tzümetsüing agi metsüingbanger aliba angur. Linük yimtiba aser temeket nung asemnü tzüinglu kanga sashia aruba sülen Hombarnü ketdangsürtemi nisung aika taolen maka aliba kumzuka liasü.

Myanmar jade mine anentsüh lendong nung nisung aika sama

Hpakant, Luchii/Dec. 22 (Agencies): Myanmar linük north tsütsü jade (senti long tabu ka) atudak anentsüh alua nisung ka asüba jangjaogo aser ano nisung 100 shi samar bushir, ta tekumzükba mapa inyakerteri ashi.

Tekumzükba mapa inyaker rongnung züingsem Ko Nyi-i osangbener dang ashiba agi, Kachin state kübok Hpakant mine nung Bodhbarnep 4:00 ako meta anentsüh aluba sülen nisung 70-100 shi samar bushir.

"Onoki yirur aliba nisung 25 mozü kidangi yokogo aser nisung ka tasü ngutet."

Tekumzükba mapa inyaker nisung 200 shi arua iba tesem nung nisung temang bushir aser kari anasa aliba awatsüing nung rong amshia nisung tasü mang bushir, ta pai ashi.

Yangji alir osangbener kati social media nung noksa ka sayuba nung nisung ter dak tema awatsüing kumbang nung nokdaka liasü aser kari tzü nung rong anioka liasü.

Sentilong atur nisung 20 tashi anentsüh nung süogo, ta yangji aliba Kachin News Group

ajanga ashi. Myanmar fire services-ia sangdong ka nung Hpakant aser anasa aliba Lone Khin nungi külem züingsemtemi tekumzükba mapa inyaker, ta ashi saka nisung asüba mesüra samaba indang kecha mashi.

Myanmar nung rongsen aketba saka junga maziükba jade industry nung inyaker küm shia nisung jenti asür, kong taa ajema agütsüba migrant worker temi China nung kanga sabua amshiba sentilong ya bushir. Item senti long atuba tesemtem azüoktsü aser saru meshitsü asoshi raratepba mapang yangji aliba nüburtem tiyong nung mejeper aser ano temesepba mozü aser nok-o-nü maziükteki ayokba ajanga rara tali tepenjaba kumdaktsür.

Taoba küm Kachin state kübok Myanmar indang jade trade tiyong, Hpakant nung tzüinglu sashia arua anentsüh tulu aluba nung nisung 170 dak tema asü.

COVID-19 tashidak wara mechi rongsenketzüing nung tali timtemba ajanga migrant tali jade mine bushia aotsüsa akum, kong

February ita Myanmar mitkari tashiyim amshia sorkar atsüingdokba sülen rara tesashiba kuma lir.

Nobel Peace sempet angur Aung San Suu Kyi'er atsüingdoker aliba sorkari 2016 küm sorkar tentetba mapang iba industry ya mürektetsü nangzük, saka temelenshi kangabo majiteter, ta activist temi ashir.

Alima nung jade amshiba ya shilem 90 shi Myanmar nung adoker. Timba Hpakant nungi adoker, kong mitkar tanishir aser telungpur telok balala den sendaktepa aliba mining firm temi küm nung sen dollar billion aika ajangzük, ta temeden asoshi nokdakba telok temi ashir.

February ita mitkartemi sorkar atsüingdokba ajanga ano lendong aliba aser talenba ka maliba industry nung temelenshi samadaktsü, ta Global Witness ajanga taküm ashi.

Global Witness ajanga ano taoba hopta osang ka sangdongba nung, Myanmar mitkartemi linük nung sen dollar million aika indang gemstone industry ya amokbanga lir, ta ashi.

Nigeria aluyimer aser shiruru metsür tsüingta raraba nung nisung jenti asü

Abuja, Luchii/Dec. 22 (Agencies): Linük tiyonglen Nasarawa state nung aluyimer aser shiruru metsürtem tsüingta azüdokshiba nung nisung jenti asü, ta Nigeria tir indang office ajanga ashi.

Tir Muhammadu Buhari indang office ajanga Mongulbarnü menur osang ka sangdongba nung ashiba agi, Hokulbarnü azüdokshi adokba nung aluyimer tajemba agi nisung 45 asü. Ano nisung aika yiru, ta ashi.

Iba ama nisung tepsetba asoshi Buhari-i mangyim tejashi lemsatep aser tapidangba makai iba ama mapa tamajung inyaker nem tapet temerenshi agütsütsü, ta ashi.

Prangbong bena aliba Fulani shirur metsürtemi Tiv ethnic telok nungi yimdaklir amakba mapang azüdokshia liasü, ta yangji aliba police ajanga ashi. Fulani telok nungi lenir ka tepsetba atema parnoki Tiv aluyimer tenüing asener. Mepetmesü ya Deobarnü tashi liasü.

Mezüngbo nisung ti asü, ta police temi shia liasü.

Tensa azüoktsü aser aibelener aputsü atema mitkar aser police tem yoka lir, ta Nasarawa state police odongtar Ramhan Nansel-i ashi.

"Fulani shirur metsür ka tepsetba indang osang onoki angashi, saka onoki bushisüingdangba mapang Hangara yimtsüing aser anasa aliba Kwayero yimtsüing nung mang yanga amak," ta Ramhan Nansel-i ashi.

"Iba lendong nung nisung ti

tepsset aser parnok temang ya police temi nguteta mozü kidangi bener ao."

Saka iba lendong nung asüba ya iba dang nungi timba lir, ta Tiv Development Association nungi Peter Ahemba ajanga ashi.

"Lafia, Obi aser Awe district tem nung aliba yimtsüing 12 amakba nung tepsetba nisung tasü mang 20 dak tema onoki ngutet aser nisung 5,000 shi tesem balala nung jenshia lir. Ano nisung aika samar bushir," ta pai ashi.

Tesem ka nungi tesem ka nung kiset shiruru chiyimdakja senzürtem aser item tesemtem nung aluyimer tsüingta shiruru chiyimdaktsüba aser tzü agi raktepa raraba ya central Nigeria nung teti ataloker.

Tangbo iba ama raraba ya ethnic kin aser tamangba yimsü nunga ajemdaker ataloker. Fulani nunger shiruru metsürtem ya Muslim nungertem lir, aser aluyimer ya timba Khristanpur.

Küm 100 dak tema jakdang nungi tzüingsarusa, nütsüing yongsük zünba, nisung aliba tesem nung alu ayimba aser junga yimsü mesütetba ajanga iba ama rara ya ataloka arur.

Ano kiset shiruru auyar teloktem tsüingta azüdokshiba, yimtsüing amakba, nisung tepsetba, rongsen auyaba sülen ki rongtsüba ajanga tensa tamajungba kumdaktsür.

Nasarawa State indang governor, Abdullahi Sule-i Fulani shiruru metsürtem aser Tiv aluyimer tepseter aputsü nangzuka lir.

COVID Omicron: European linüktem nung tenokdangba benokshir

London, Luchii/Dec. 22 (Agencies): Coronavirus tabu tasenba, Omicron maneni prokshia aoba ajanga European lenirtemi tenokdangba tanaben benokshir.

Christmas matongdang tenokdangba balala agütsüba aser social distancing mera tali agiba linüktem rongnung Germany aser Portugal dena lir.

European linük aika nung Omicron ya timba kumogo.

Spain nung iba tashidak wara tenzükba sülen anogoshi cases tasen putetba tang timtiba lir aser France nunga anogoshi cases tasen putetba ya 100,000 ajungtsü, ta ashir.

Linük nung anogoshi COVID-19 tashidak agi menepba ya tang 70,000 shi lir aser January ita tashinung Omicron variant ya timba akumtsü, ta French Health Minister Olivier Véran-i ashi.

Europe tesem ajungalen cases timba akumba ajanga health system nung timtem ajurutsü, ya iba continent nungi World Health Organization ketdangsürtemi ashi.

Ano yipru tesashi arur aser sorkar balalai cases tali akumba anepalutsü renema alitsüla, ta Hans Kluge-i ashi.

France nung Bodhbarnü nungi tenzuka tanur arishi küm pungo nungi 11 tsüingta alirtem nem vaccine agütsü tenzükogo, saka iba booster tem ya tangbo arishi küm 12 nungi 15 tsüingta alirtem asoshibo magütsür, ta ashi.

December 28 nungi tenzuka juri adenshiba nisung ter tashi melatsü aser nightclub tem shibangtsü, ta Germany-i sangdongogo. Iba anogo nungi tenzuka football match tem kishi shibanger asayatsü.

"Coronavirus ya Christmas sodi magir. Taruba wave asoshi asenok tenük shibanger malitsü, koba agi asenok amokbangtsü," ta Germany Chancellor Olaf Scholz-i Mongulbarnü ashi.

Portugal nung bar aser nightclub tem December 26 nü nungi shibangtsü, aser kasa anogo nungi January 9 tashi mapa kidang nungi inyaktü sangdong. Kima lokti adenshiba nisung ter tashi melatsü.

Finland nunga bar aser restaurant tem December 24 nü nungi tenzuka aonong 10:00 ako (par mapang) nung shibangtsü, kong cases tasen ya kanga timba akumer. December 28 nü nungi tenzuka hopta asem asoshi restaurant tem nikongdang 6:00 ako nung shibangtsü, kong menden ajema yutsütsü. Eu indanga rütsü maliba Schengen zone nungi arurtemi negative COVID test sayutsüla.

UK nung COVID-19 agi menepa alirtem anogo trok mesüra tenet buba nung negative test sayutetra, anogo tenet sülen quarantine asütsü, ta Health Secretary Sajid Javid ajanga metetdaktü.

Christmas matongdang England nung tenokdangba tasen malitsü, ta Ato Kilonser Boris Johnson-i tamale shia liasü, saka Scotland, Wales aser Northern Ireland linüktem nung lokti adenshiba nokdangtsü sangdong.

Sweden nung Bodhbarnü nungi tenzuka bar, café aser restaurant tem nung mena

alirtem nem dang achi-ajemtsü agütsütsü aser nüburtem dang akok tashi kidang nungi inyaktü shiogo.

Omicron cases timba akumtsü imlar aser health care system khuret tuluba akumer, ta Health Minister Lena Hallengren-i ashi.

Netherlands nungbo tenokdangba agütsüogo, kong Hombarnü tenokdangba tesashi sangdong, saka danga European lenirtemi akok nungbo benjong mapang sülen ang tenokdangba tesashi agütsüner, ta BBC Europe correspondent Nick Beake-i ashi.

Mongulbarnü Spain nung COVID-19 cases 49,823 liasü, kong tesüiba mapang cases timtiba ya January ita nisung 44,357 dak puteta liasü. Tenokdangba tasen benoktsü atema Prime Minster Pedro Sánchez-i region nung lenirtem den senden amener.

Europe nung cases million 89 dak tema kumogo aser COVID-19 tashidak agi asüba nisung million 1.5 lir, ta EU ajanga ashir. Omicron ya mezüing

southern Africa nung taoba ita puteta liasü saka tangbo alima tesem ajunga sünga prokshio. Omicron ya tesashiba sütsü ta alima balala nungi bendenba data ajanga sayur, saka iba variant yagi tali shirangdaktsüba kuli nguteta mali.

WHO indang European region nung iba tashidak ya linük 53 aliba nungi linük 38 nung puteta lir, aser item rongnung Russia aser Turkey densema lir aser linük kar nung iba variant ya sashia jateta lir, ta ashir.

"Temetetba ano yipru tesashi ka arutsü. Hopta ishika tsüingta Omicron yagi region nung linük timba amokbangtsü, anungji health system nem khuret onsara agütsür aliba tali tamajungba akumtsü," ta Dr Kluge-i ashi.

"COVID-19 cases tasen timba akumba ajanga mozü kidangi aor timba akumtsü aser health system aser danga tongtipang services ajaklen timtem ajurutsü," ta pai ashi.

"Sorkar aser ketdangsürtemi tensa tamajungba atea renemshia alitsü nüngdaker."

**KHAR KAKETSHIR TELONGJEM
PLATINUM JUBILEE**



Omen: "Ningjang Tasenleni"

(Towards New Horizons)

Anogo: 28th & 29th December 2021

Jubilee Sentong Lapoktsür:

Shri. Asangba Chuba Ao IAS,

Secretary, Education Department, Govt. of Bihar,

Alakteta Jaoker:

Shri. Temjen Imna Along

Hon'ble Minister, Tribal Affairs and Higher Education, Govt. of Nagaland

Jubilee Shibangtsür:

Dr. Longrineken

Advisor, National Highways, Treasuries & Accounts, Govt. of Nagaland.

Tongti O Jembir:

1. Shri. Taliremba

Officer on Special Duty (Finance) Govt. of Nagaland

2. Shri. C.T. Jamir

Senior Advocate, Gauhati High Court Kohima Bench: Kohima, Nagaland

3. Rev. T. Alemla Walling

Associate Pastor Women Ministry Khar Baptist, Arogo

Office of the

Mokokchung Town Khensa Senso Telongjem

TENÜNGSANG AGÜTSÜR

1. Mr. T.Spongmar Longchar, Promoted to Joint Director, Department of Agriculture, Government of Nagaland.

2. Mr. Moasunep Walling, Promoted to Inspector Task Force, Mokokchung Municipal Council.

2021 küm tsüingda tenai temaba menden tajung ajangzükba atema Mokokchung Town Khensa Senso Telongjem (MTKST) ajanga tenüngsang agütsüa iba sabang ajanga lemsateper. Tsüingremi tena taküm aser wadang maneni moajangma.

Sd/-

**Wapangtemjen
President, MTKST**

Sd/-

**Medemmayang
Secretary, MTKST**



Wokha, Luchii/December 22, 2021: Elite Music Ensemble, Phek ajanga ayongba Students' Music Recital, Season 6 sentong nung Phek Deputy Commissioner, Razouvolie Dozo-i telok den jembiba noksa nung angur.

Hornbill International Photo tetoktepba takoker sangdongogo



Dimapur, Luchii/December 22 (TYO): Department of Information & Public Relations and Tourism Department den longjemer Eastern Art Council-i ayongzükba Hornbill International Photo tetoktepba ya Hornbill benjung mapang agia liasü. Sempet agütsüba sentong ya yimya agi benjung tatembangbuba anogo nung agi, ajisüaka Mon nung tia maka tatalokba ajanga iba sentong

thinentsüsa aküm. Tetoktepba nung takok angurtem nem sempet agütsüba sentong December 22 nü agiogo. Tetoktepba nung takokertem nem sempet ya BAN (Business Association of Nagas) tir L. Mongkum Jamir-i Dimapur nung agüja liasü. **Takok angurtem vamai alitsü:** 1st Longso Yimkhing (Kiphire)

2nd Inakavi Kasho (Kohima), 3rd Parvej Akhtar (Kolkata) Consolation angur 10: Kenei Chadi (Dimapur), Monalisa Kar (West Bengal), Neikese Samuel Yalie (Kohima), Irangbam Momocho Singh (Manipur), Joynav Dowerah (Dibrugarh, Assam), Mezizo Swiho (Kohima), Rah (Dimapur), Benrio Humtsoe (Dimapur), ImkongAier (Medziphema) aser JoynavDowerah (Dibrugarh, Assam) viewers' choice. Iba tetoktepba ya Merimvu Doulo, Kekhriez hazomiachieo, Ayieno Kechu nungeri tendanga liasü. Mezüingbuba jenang nung takok angusang nem senpet sen 25,000 aser tanabuba aser tasembuba nem senpet sen 20,000 aser 15,000 agütsü. Consolation agizüker shianem senpet sen 5000 agütsü. Parnok rognung kabo viewers' choice liasü.

Benjung mapang Omicron nungi jenboa alitsü tetuyuba agütsü

Dimapur, Luchii/December 22 (TYO): Covid-19 B.1.1.529 variant ya lendong keta aliba variant ka ta sangdongogo aser November 26 nü Omicron ta nungja agütsüogo. Omicron ya divergent variant ka kong spike protein nung 26-32 mutations lir aser iba ajanga immune paitoktsü aser takaraba menatepyonga aotsü akok. December 16 nü tashi nung Omicron ya WHO indang tesem 6 prongla aser linük 89 (WHO) nung potetogo, kong India nunga state aika nung potetba densema lir. Omicron dak sendakba nung kuli ano tejangja mali aser data aser bushisüing dang tali nungdaker. Omicron dak sendakba nung tang tashi nung jangjaa alibatam kulitem yamai alitsü. Effect of Omicron VOC on;

1. Transmissibility

- Omicron ya Delta VOC (MoHFW) dang nungi asemben agi takaraba menateper
- Omicron ya delta (WHO) dang nungi takaraba aintsü akok
- Omicron menatepa aoba linüktem nung doubling time ji anogo 1.5-3 (WHO) tsüingda lir
- High level population immunity (WHO) aliba linüktem nunga Omicron kanga kara prokshia odar
- Index case nung Higher rate of transmission. Secondary attack rate ji 21.6% koba Delta (UK study) bo 10.7 % dang.

2. Disease severity

- Iba variant ya koda tesashi, aji tangang asadangdar, kechiyong tashidak menatepa aoba aser mozükidang nisung temang anepaluba mesera tasüba tsüingda mapang agir.
- UK aser South Africa nung mozükidangi anir aoer anogoshia timba akümtsü-Omicron agi tamajungtiba kongshir aliba linük ana
- VOCs dang nungi Omicron tesashiba mesera mesashiba aija ashitsü karara. Ajisüaka data ajanga ashiba agi, iba variant ya Delta variant dang nungi tesashibabo masütsü saka mozüki nung nisung timba anepalutsüsa akümtsü kechiyong iba tashidak kanga kara menatepyonga aoer. Mozükidang nisung aika temang anepaluba ajanga health system nem khuret tali agütsütsü aser iba ajanga tasüba tali akümtsü- WHO

3. Impact on Diagnostics / Test Kit

- Omicron potetsü atema RT PCR kits aser Rapid Antigen tests tapet. Maneni iba sülen genomic sequencing-a anidaksü

4. Effect on VACCINES / Immune evasion

- Tanga VOCs dang nungi Omicron tashidak ya tali menashir (South Africa/UK Study)
- Preliminary data ajanga Omicron neutralizing titres tajemba akümba sayuogo
- Vaccine dose ana agiba ajanga Infection, symptomatic disease, aser hospitalization (WHO) dak sendakba nung omicron menartem kangabo tajangzük magütsür.
- South Africa-i, Pfizer BioNTech-Comirnaty vaccine indang effectiveness ji shilem 33 aser mozükidangi aotsüsa shirangba nungibo shilem 70 agi kümzüker ta ashi.
- Humoral immune response tajemba kümaka mezüing data ajanga Omicron epitopes 70% bo T- Cell recognition agi effect masütsü akok, koba tetezü tashidak agi kanga mejungi atongtsü aliba cellular mediated protection bo kümzüka ayutsü
- Tashidak agi kanga mejungi shirangtsü aliba aser tasüba nungi jenbotsü atema vaccine agiba ya dang ajak dang

tajungtiba

5. Impact on Available Treatments/ Therapeutics

- Corticosteroids aser IL-6 blockers maneni effective asütsü.
- Vitro data ajanga ashiba agi, SARS-CoV-2 anema develop asüba monoclonal antibodies kar Omicron anema neutralization tajemba kümogo-WHO

6. Public Health and Social Measures

- Mask tapet asemtsü, lokti nung tetsüingda ita inyaksangshitsü, kilong nung ventilation tapet inoktsü, lokti nungi pilaa alitsü aser merkemjua alitsüji SARS-CoV-2 menatepa aoba tajemba kumdaksütsü atema ajak dang tongtibangtiba. Ajisüaka kanga kara menatepyonga aoba variant nokdangtsü atema PHSMs ajungkettsüsa akümtsü- WHO
- Iba kulitem dak ajemdaker state nung benjung mapang anidaksü atema tetuyuba kar agütsüogo, kechiyong iba ajanga dang benjung sülen tashidak tali menatepa aoba aser tasembuba wave arutsü aliba nokdangtetsü.
- 1. Mask amshiba ajanga Variant mashi ka menatepa aoba nokdang. Nisung ajaki lokti adenshiba tesem, talisa nisung metidak aser kilong nung mask asemtsüla.
- 2. Lisopur ajaki khuret angateta takok tashi lokti tulu adenshia mamungtsü, lokti tulu nungi pilaa alitsü aser mask amshiba aser merkemjua aliba amala tetuyuba sülen anidaksüla. Nisung taküm kaji sentong ka thinenba mesera athiba dang nungi taoba.
- 3. COVID-19 vaccines agi tashidak variant mashi ka agi kanga mejungi atongtsü aliba aser tasüba nungi kümzüker. Tasüba nungi jembotsü atema vaccine agitsü ajungshir aser vaccine magi alirtem mesera shirnok tanabuba dose magi lir, parnoki tasembuba wave maru tsüingda mapang shidak nung vaccine agitsü nungdaker.
- 4. COVID-19 tashidak temaitsü keta alirtemi tashidak tendangtsüla aser lokti nungi pilaa alitsü nungdaker.
- 5. Senzusenpongertemi tetuyuba agütsür aliba sülen tashi angaa anidaksüla aser parnok health aser symptom tem meita alitsü nungdaker.

SPECIAL APPEARANCE
On 29th Dec. Evening 2021

SUNEP LEMTUR

DREAMZ UNLIMITED

CHUCHUYIMPANG KAKETSHIR TELONGJEM
Platinum Jubilee Celebration

Omen: "Mangdangsen"

TONGTI TEJAKER

- Dr. NANGSHI K. AO
HON'BLE MLA, 25 MONGOYA A/C
- Prof. LANUSASHI LKR
HOD GEOGRAPHY, NU
- Kr. AOTULA T. IMCHEN
IPS, SP MOKOKCHUNG
- Wb. IMOAKUM JAMIR,
BDO

TONGTI O JEMBIITEM

- Wb. AKOK WALLING
FORMER PRINCIPAL,
DIMAPUR GOVT. COLLEGE
- Dr. N. MOA IMSONG
COUNSELOR, DABA
- Wb. NUKSHIMOA
ASST. PROF. FAC

28th-29th DECEMBER 2021 TESENTEPDAK : YIMKUMSHIBA TESEM CHUCHUYIMPANG

IPL Lucknow franchise-i Dahiya assistant coach asütsü shim



Vijay Dahiya

New Delhi, Luchii/December 22 (Agencies): IPL 2022 metenzüksüngda taoba mapang wicketkeeper-batter Vijay Dahiya, assistant coach mapa inyaksü atema Lucknow franchise-i Bodhbarnü shimogo.

Haryana nungi arishi küm 48 tain coach ya tang Uttar Pradesh team coach lir. Taoba mapang pa IPL anaben tashi koker aliba Kolkata Knight Riders team indang assistant coach liasü.

Paisa, Delhi Capitals atema talent scout mapa benogo aser iba den Delhi Ranji team dena coach süogo.

"Lucknow IPL franchise den inyaksü atema iba

Madrid nungi asayar Alaba 7 Isco na daka COVID-19 potet

Luchii/December 22, 2021 (Agencies): Real Madrid team nung Covid-19 tashidak menar aliba asayatem rongnung David Alaba aser Isco Alarcón nata züngoksemogo. Tena densema first team nung asayar ti dak tashidak menar tang temang anepaludar.

Madrid nung covid tashidak

Ind vs SA: Test Series nung Anrich Nortje masayatsü

Luchii/December 22, 2021 (Agencies): India team den Test series asem tenzüksü anogo ishika lia, Mongolbarnü South Africa nung tongti asayar kati shilem magitetsüsa akümba yong squad asoshi tebilemsü tulu adoker. Team nung tongti fast bowler Anrich Nortje, shiba temang nung timtem liasü, iba timtem nungi junga taneptsü manguba sülen Test series nungi pa tukuogo, ta sangdong ka ajanga Cricket South Africa (CSA)-i metetdaksü.

ICC World Test Championship nung tongtibang point kar bendenloksü asoshi asalentong yangluba mapang ka nung, iba series nungi Nortje tukadokba ya tayonger team (South Africa) atema tetsükdaksü tulu asütsü.

"India den taruba Betway Test series asaya asemprongla nungi Proteas bowler, Anrich Nortje temang nung ano timtem

India team nunga tongti

maongka agütsüba atema kanga pelar," ta Dahiya-i ashi, shibai India team nungi Tests ana aser ODI 19 asayaogo.

Lucknow team ya RPSG Group nung shilem ka lir aser parnoki taruba IPL asayamung atema taoba mapang head coach asütsü Andy Flower shimogo aser mentor asütsü Gautam Gambhir shima liasü.

BWF rankings: Kidambi Srikanth top 10-i iogo

New Delhi, Luchii/December 22 (Agencies): World Championship nung silver medal anguba sülen Bodhbarnü sayaba Badminton World Federation (BWF) rankings nung India nung nungtuugu badminton asayar Kidambi

agi menar aika akümba mapang ka nung Mongolbarnü Alaba aser Isco nata züngoksemogo.

Tashidak menar alirtemrongnung Luka Modric, Marco Asensio, Rodrygo, Gareth Bale, Marcelo, aser backup goalkeeper Andriy Lunin nung densema lir.

Parnok rongnung ka danga la Liga nung temaba jenjang

Srikanth jenjang pezü tejkadangi tua top 10 tongogo.

Guntur nungi arishi küm 28 tain asayar yagi Huelva, Spain nung final tonga asayatetba sülen pa ranking nung jenjang 10buba nung lir.

Kasa mapang nung India nung asayarsa Lakshya Sen, shibai tang mezüngbuba World Championship nung bronze medal ngua liasü, paa jenjang ana tejkadangi tua 17buba tongogo ajisüaka B Sai Praneeth jenjang ana asepzüka lua jenjang 18buba nung lir.

Spain nung World Championship asayaba mapang quarterfinal tonga asayatetba sülen HS Prannoy-a jenjang trok tejkadangi tua tang jenjang 26buba nung lir.

Tetsür kija asaya nung Olympics nung medal ana tashi koker alila; PV Sindhu maneni tenetbuba nung lir aser Saina Nehwal shiba tang temang anepaluba mapang lir, la jenjang 25buba nung lir.

Tebur tarep asayar Chirag Shetty aser Satwiksairaj Rankireddy na jenjang ka asepzüka lua 10buba nung lir aser tetsür tarep asaya nung Ashwini Ponnappa aser N Sikki Reddy na maneni top 20 nung lir.

nung aliba club Athletic Bilbao den asaya nung shilem magitetsü.

Kasa mapang nung Bilbao pura iba asaya nung asayar pezü tashi masayatetsü, shirok dak tashidak poteter lir. Asayatem rongnung Spain goalkeeper Unai Simón aser defender Iñigo Martínez na densema lir.

asayar ana vice-captain Rohit Sharma aser all-rounder Ravindra Jadeja naprongla yirur aliba ajanga iba Test series nung masayatsü. Tena dak alaka, Shubman Gill aser Axar Patel naprongla yiruba ajanga iba series nungi tena tukuogo.

India team South Africa maodang, training session agiba mapang Rohit Sharma yirua liasü. Ano külen, Kanpur nung mezüng Test asayaba mapang Jadeja teka yirur külen nungi pai cricket asayamung ka nung danga shilem agidanga mali.

Tang asayar anaprongla (Rohit aser Jadeja) Bengaluru kübok National Cricket Academy (NCA) nung anepaludar.

Iba Test temer sülen, Rohit-i anir South Africa nung ODI series asem asayatsü imlar saka Jadeja atema ano osang tejangja magütsü.

Asian Champions Trophy: India-i Pak koka bronze angu

Dhaka, Luchii/December 22 (Agencies): Asian Champions Trophy men's hockey tournament nung Bodhbarnü India-i goal 4-3 agi Pakistan madak takok ngua bronze medal nguogo.

Round-robin round nung temaba jenjang nung tembangba sülen Tokyo Olympics nung bronze medal ngur aliba team yagi asaya ana atonga junga masayatet aser Manpreet Singh-i aniba team ya kanga merang asayarang takok ngua liasü.

Mongolbarnü semifinal nung Japan-i goal 3-5 agi tsükdaksüba sülen Pakistan den asaya nungbo junga asayatetsü ta imlaa liasü. Parnoki kanga nongshia asaya aser penalty corner 11 densema goal idaktsütsü atema maongka aika angu saka penalty corner ana nung dang parnoki goal idaktsütet.

Muscat nung taoba küm iba asayamung asayaba mapang India-i takok angu aser Pakistan tanabuba jenjang nung liasü,

saka takümba team anaprongla consolation prize dang ngur meyipa aotsü.

Asaya nung India nung asayar Harmanpreet Singh-i minute ka tsüngda mezüngbuba goal idaktsü aser iba sülen Sumit (45th), Varun Kumar (53rd) aser Akashdeep Singh (57th) nungeria goal kaka idakja liasü.

Pakistan atema Afraz (10th), Abdul Rana (33rd) aser Ahmed Nadeem (57th) nungeri goal kaka idakja liasü.

India-i iba asayamung nung round-robin round nunga goal 3-1 agi Pakistan kokogo.

Japan den asaya ama masü India-i tasembuba jenjang atema toktepba mapang tetenzük nungi Pakistan defence nem kanga timtem agütsü ajisüaka parnoki imlaba ama goal midaktsütsü liasü.

Asaya nung India-i kanga nongshia asayaba ajanga penalty corner 11 tashi yoktsü atema maongka angu ajisüaka parnoki ana dang goal idaktsütsü liasü.

South Africa aser India na asayamung methitemi asayatsü

New Delhi, Luchii/December 22 (Agencies): BCCI aser Cricket South Africa nati team ana tsüngda taruba Test aser ODI asayamung mapang asayar mesera support staff tem dak COVID-19 tashidak potetyonga maneni asayatsü mulungtepogo aser tashidak menar alirtem den ajuruteper alirtem lokti nungi pilaa metoktsütsü, ta SA board medical officer Shuaib Manjra-i ashi.

India aser South Africa na tsünga December 26 nü nungi tenzük Centurion nung mezüngbuba Test asayatsü aser iba sülen Johannesburg (January 3-7) aser Cape Town (January 11-15) nung asayatsü.

Test asayamung tembangba sülen January 19, 21 aser 23 anogotem nung ODI asem asayatsü.

South Africa nung wara tamajungba küma ora BCCI-i asayamung nung shilem magitsü atema teletetba agitsü asoshi mulungteper lir. Ketzangsur tejen kati ashiba agi, iba asayamung thitsütsü atema kecha sentong mali.

"Onoki India den sensaksema inyakyim ka mulungtepa agizükogo. Asayamung dak sendaka alirtem ajak vaccine agir alitsüla aser tashidak menartem temang

tamajungba mekümba pei hotel takdang nung dang lokti nungi pilar temang anepalutsü," ta Manjra-i ashiba Cricket South Africa-i PTI nem metetdaksü.

Asayamung mapang team anapongla anogoshia Rapid Antigen Tests agitsü aser tashidak menatsü akok ta team anapronglai jangjaa lir. Ajisüaka kümdangshia dang inyaksangshira asayamung methitemi asayatetsü.

"CSA-i India team nem agütsüba bio-bubble dak BCCI-i kanga temulung asür. Auh onoki asayatem aser parnok kibongtem tejangraba dak ajemdaker teletetba agitsü.

"Tang tashi nungbo nisung ajak bubble nung lir aser anogoshia tashidak tendangdar," ta BCCI ketdangsur tejen kati ashi.

India South Africa-i oa asayaba ya Cricket South Africa atema commercial rights dak sendakba nung kanga tongtibang lir aser iba den iba asayamung ajanga broadcast rights dak sendakba nung sen aika aazüksü.

Centurion nung India team kangadang tesadem resort ka nung anenzüka lir, anungji asayar aser parnok kibongtem parnok inyaksangshi sadema lir. Iba asayamung nung asayatem ajak terpranger medeni asayatsü.

BILEMDANGANG

"Rongsen benburtem iba alar akümtsü."